

# CBETA電子佛典集成

---

CBETA Chinese Electronic Tripitaka Collection  
eBook

J39nB451

## 赤松領禪師語錄

清 道頌說 寂源錄（依駒本印）

財團  
法人

佛教電子佛典基金會



# 目次

- [編輯說明](#)
- [章節目次](#)
  - [序](#)
    - [法秀序](#)
    - [殷弼夢序](#)
  - [目次](#)
  - [上堂一](#)
  - [上堂二](#)
  - [小參](#)
  - [示眾](#)
  - [示眾偈](#)
  - [法語](#)
    - [示太中丞王公](#)
    - [示我和關大檀越](#)
    - [示西星白檀越](#)
    - [示翁檀越](#)
    - [示知參魯居士](#)
    - [示昭然禪人](#)
    - [贈閒菴淨敵居士](#)
    - [示佛燈禪人歸里](#)
    - [示孫演密](#)
    - [示融之禪人](#)
    - [示繼脈監院](#)
    - [示至賢善人](#)
    - [示慈容善人持咒](#)
    - [示碧松禪人](#)
    - [示大潤居士](#)
  - [拈頌](#)
    - [世尊初生](#)
    - [睹星悟道](#)
    - [女子入定](#)
    - [臨濟三問大意三度被打](#)
    - [趙州訪二菴主](#)
    - [勘破婆子](#)

- [婆子燒庵](#)
- [千聖不傳](#)
- [鍊蛇橫古路](#)
- [萬仞懸崖](#)
- [撒手而歸](#)
- [僧問首山如何是佛山云新婦騎驢阿家牽](#)
- [趙州一日於雪臥云…](#)
- [閱密菴祖錄](#)
- [贈偈](#)
  - [贈佛燈禪人](#)
  - [贈慈忍禪人](#)
  - [贈松菴禪人](#)
  - [贈鶴聲監院](#)
  - [贈嵩岩大師](#)
  - [贈良遂更號佛遂](#)
  - [贈憨拙禪師](#)
  - [贈海雲禪人](#)
  - [贈大之大德](#)
  - [贈大林禪人](#)
  - [贈鶴樹禪人](#)
  - [贈天臺省參禪師](#)
  - [示懷元侍者](#)
  - [示震南侍者](#)
  - [示嶽雲侍者](#)
  - [示寶印禪人](#)
  - [示黔谷禪人](#)
  - [示泰寧禪人](#)
  - [示泰然禪人](#)
  - [勉實參禪人](#)
  - [示可也禪者](#)
  - [勉達也禪人](#)
  - [贈悟空禪人](#)
  - [贈寶月禪人](#)
  - [勉歸元禪人](#)
  - [贈瑞徵楊檀越](#)
  - [贈龍菴居士](#)
  - [勉從佛居士](#)
  - [勉心宗居士](#)

- [贈公夏詞宗](#)
- [贈淡也喻詞宗](#)
- [甞師吉居士](#)
- [贈善權居士](#)
- [贈淨圓善人](#)
- [贈佛月居士](#)
- [甞淨月居士](#)
- [贈淨孝居士](#)
- [贈李公大檀越](#)
- [示燦明居士](#)
- [贈淨敵居士](#)
- [示佛意居士](#)
- [答佛宗大德拈花曹溪意旨](#)
- [示瑞貞居士](#)
- [贈宗明居士](#)
- [示佛貞居士](#)
- [贈紫岩居士](#)
- [甞修來居士](#)
- [贈靈源居士](#)
- [贈祇園居士](#)
- [贈大幢居士](#)
- [贈聖林居士](#)
- [甞賢林居士](#)
- [昂子穎居士](#)
- [示雙林禪人](#)
- [甞慈願居士](#)
- [示義月居士](#)
- [贈圓慧善人](#)
- [示超元淨玉居士](#)
- [示淨富居士](#)
- [示佛賢佛悅居士](#)
- [示直慈居士](#)
- [贈鳴佩冉詞宗贈名](#)
- [甞純素居士](#)
- [贈明遠詞宗](#)
- [示靈然居士](#)
- [贈昇寔居士](#)
- [示顯枝居士](#)

- [示王官堡眾居士](#)
- [贈來源居士](#)
- [雜著](#)
  - [參禪偈](#)
  - [念佛偈](#)
  - [掛鐘](#)
  - [布袋和尚](#)
  - [天童密祖](#)
  - [雙桂師翁](#)
  - [慈雲老和尚](#)
  - [繼岐山何居士](#)
  - [天童掃密雲悟祖塔](#)
  - [慈雲掃先老和尚塔](#)
- [詩集](#)
  - [序](#)
  - [詩](#)
    - [夏日道中同友游太和宮樹下](#)
    - [挽澹餘曹老先生](#)
    - [春日送別魯公佟檀越](#)
    - [答孟陽熊檀越登山韻](#)
    - [贈別金檀越](#)
    - [次卞司馬游東山韻](#)
    - [贈臬憲高護法榮陞](#)
    - [次譚牧州魚聲韻](#)
    - [同友人賦得月下聽溪聲](#)
    - [復史春元問道韻](#)
    - [次登山韻](#)
    - [送中丞曹公板歸值雨有懷](#)
    - [友人至山題以贈之](#)
    - [送別在臣楊檀越遷楚黃郡丞](#)
    - [詠桂贈友](#)
    - [贈游山客](#)
    - [訓夏孝廉韻](#)
    - [春日閒詠](#)
    - [友人過訪賦贈](#)
    - [次田春元夜賞菊韻](#)
    - [春日次訓張詞宗過訪不遇韻](#)
    - [贈別乾御一乘二禪人](#)

- [同友人登大悲閣望武侯祠](#)
- [次譚州牧鰲磯浮玉韻](#)
- [壽撫臺慕檀越](#)
- [壽撫軍王檀越](#)
- [次撫軍楊檀越游山](#)
- [贈撫軍王檀越服制還京](#)
- [次梁道臺登東山韻](#)
- [送別曹公子值雷雨感賦](#)
- [贈糧憲傅檀越榮陞](#)
- [過般若庵](#)
- [同臺二護法河岸蓬居作](#)
- [游大悲閣](#)
- [花朝](#)
- [詠梅壽東林法兄](#)
- [次荅臯庵胡居士](#)
- [次眾春元游山韻](#)
- [訪殷夢臣先生不遇](#)
- [訪東山梅溪法兄](#)
- [掃九峰開山祖塔](#)
- [次法瀾禪師韻](#)
- [贈九峰瞿中兄](#)
- [雁字一行書](#)
- [挽曹大中丞](#)
- [和有牧李居士久別來山韻](#)
- [次孔詞宗登山留題](#)
- [次中丞袁大檀越韻](#)
- [喜大之胡長者入道](#)
- [遊海子玉京山](#)
- [次東林玉和尚](#)
- [菊](#)
- [粉蝶夏來時](#)
- [和時乘夏詞宗韻](#)
- [答司南貢元](#)
- [黃詞宗登山分題得柑字](#)
- [山居](#)
- [山居次答昇旭詞宗韻](#)
- [聞詠](#)
- [紫薇](#)

- [避亂感懷寄殷夢臣先生](#)
- [贈蔡大中丞](#)
- [聞提臺侯公訃感悼以寄](#)
- [春日](#)
- [和純乾道人韻](#)
- [山房閒作](#)
- [書問](#)
  - [復祇林羅居士](#)
  - [復張貢元](#)
  - [復剖元書](#)
  - [謝制軍蔡大檀越](#)
  - [謝撫憲王太檀越](#)
  - [復張經公](#)
  - [復王鎮臺](#)
  - [寄法兄天隱和尚](#)
  - [復白檀越](#)
  - [寄博達法兄](#)
  - [謝九峰瞿中和尚](#)
  - [復客問閱藏經書](#)
  - [法叔丈老和尚啟](#)
  - [寄寢堂大師](#)
  - [壽王撫軍啟](#)
  - [示文一法孫](#)
- [佛事](#)
- [行由](#)
- [卷目次](#)
  - 1.
  - 2
  - 3.
  - 4.
  - 5.
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。



## 序

少室壁觀婆羅門云行解相應名之曰祖所以吾教外別傳之旨自拈瞬破容發軔立雪斷臂以還如趙簡子之寶符藏于常山之上代代可取也苟非母恤之賢其能若是乎藉如我。

黔靈赤翁大和尚者脫白九峰燈聯雙桂茂年刻志離塵栖神澹泊耕雲墾月樂道忘憂孰意名愈晦而人知用屢藏而世羨已而問道之屐滿戶外矣遂感當道宰官之宏護四民緇白之憧憧不得已而一出焉歷主諸刹輻輳方來勤以誨物儉以持身循誘多方噓煦無既兼思晚年欲矢脅不至席以繼前烈儻非行解相應其能利物不倦之若是也耶其嗣法門人乾御大師與余有金蘭之誼負笈相從不憚間關千里重繭贐其語錄問序於余余愧未識荊盥讀至再曰嘻斯殆常山之寶符耶請付剞劂氏以廣傳諸其必有可取之毋恤矣是為序。

時康熙辛未皋月午日書於古渝州之西葑菴中

青城後學法秀寢堂槃譚撰

## 黔靈赤松禪師語錄序

嘗讀清靜法行經而知古皇先生憫震旦之難化先命大迦葉淨光儒童諸聖賢教化東土不待金人之夢而善與人同之心早已廣被萬有矣獨是其流日遠列戶分門根器未優遽承衣鉢而室羅筏城之宗旨遂爾杳不可追此有識之士所以每緘李充之口而閉涉正之目也。

赤松和尚生長錦水韓氏望族慕漢赤松子之為人遂亦仍其號焉堅生平之苦行破有漏之空花得心應手徹底掀翻敏公親印破翁嫡孫大展臨濟之祖燈樹起法門之赤幟不特其惓惓誨人為善且欲人人同歸於至善為心何若也當其閉關數載參悟上乘自覺之天良也長篇短偈陞堂入室步步引人覺後之寶筏也晚年該煉四智虛朗登座說法普濟人天覺行之圓滿也高臥黔靈翛然獨遠不求人之信從而信從彌眾或以佛法相見吾見其虛懷接引宜深者深宜淺者淺莫不迎機而導之者矣有以世法相見吾見其霽色親人可方則方可圓則圓莫不因物而應之者矣非有得於古皇大教之深心烏能惓惓焉誨人為善又人人同歸於至善若是其摯且篤哉師與余為方外交已非一日交之久而知之深且信其善與人同之量也於是乎敘。

時康熙二十年歲次癸亥桐月之吉石船釣叟殷弼夢 臣氏頓首書於黔靈新松石上

## 黔靈赤松領禪師語錄目次

- 序文(二)
- 卷一
  - 上堂
- 卷二
  - 上堂
  - 小參
  - 示眾
- 卷三
  - 法語
  - 拈頌
  - 偈
  - 雜著
- 卷四(序)
  - 詩
- 卷五
  - 書問
  - 佛事
  - 行實

目錄(終)

黔靈赤松領禪師語錄卷第一

門人寂源錄

### 住貴陽府壽世禪院語錄

康熙丁未師在白雲受閩臺張公諱光煥請於正月廿日入院。

山門 白雲深處來浩浩紅塵裏立孤峻門庭豎法幢宗旨便入。

佛殿 八十種好三十二相瞻之仰之萬古榜樣便拜。

據室 者個鋪席是令人九轉還丹底所在今日領上座到此未免曲隨條例去也豎拂子云壽世無多心地藥單單只用死貓頭便起即日眾請。

上堂拈疏云某本深居巖穴木食艸衣卻被大福德人用者符子賺出遂遞與維那云也要大家知法座云法空為座吉祥艸敷大開青白眼直踏須彌盧便陞拈香祝聖畢末後拈香云此瓣香冤頭債主一晤歡欣洗髓伐毛幾經煅煉熱向爐中供養夔門萬縣慈雲堂上傳臨濟正宗第三十二世本師敏樹大和尚用酌法乳之恩斂衣就座上首白椎云法筵龍象眾當觀第一義師卓杖云諦聽諦聽今當說摩訶衍法又卓杖云還有解聽者麼請出相見問昨日白雲今朝壽世且道是同是別師云分身兩處看進云宰官臨筵

請師登座以何法示師云沾衣杏花雨吹面楊柳風進云可謂風雲聚會虎驟龍驤師云千里同風水乳和乃云杖笠隨身滿谷白雲關不住蒲鞋著腳沿途芳草襯人來總只為步步踏著實地節節透出玄源所以入此保社賓主歷然不惜醜拙只得將從前撞著個無面孔老人分付底無義味事對眾舉揚遂豎拂子云大眾看看此是無義味事良久垂下拂子云會取好(謝辭不錄)復舉真淨和尚居山初有不出世言後受洞山請過訪香城順和尚以偈戲曰諸葛昔年稱隱者茅廬堅請出山來松花若也沾春力根在深巖也著開今日領上座也有一偈久盡寒灰枯木材春風吹醒轉青來惜花猶恐沾塵事幾次遮欄處處開結椎下座。

師於己酉夏掩關至壬子秋千日期畢遇撫軍曹公司道鎮臺文武宰官居士造法衣法被請出關。

結制上堂問和尚出關即且置如何是關中主師云無角鐵牛眠少室僧以袖拂一拂師云也是蚊子上鐵牛乃卓拄杖云說玄說妙藥之作病用棒用喝病之作藥一道平沉本無高下但有穿鑿未免禍生所以世尊未下天宮說法已竟未出母胎度人已畢四十九年一段婆心無非見病下藥惟恐法久成弊摩竭掩室作獅子吼令人透此消息直證無功用行末上多子塔前兩手分付至達磨初來此土九年面壁覓無功用人兩手分付今日不肖遠孫謬叨祖蔭守分掩室亦得此無功用法待無功用人所以祖師道多言多慮轉不相應絕言絕慮無處不通不是琉璃瓶難盛獅子乳今日領上座則不然以杖擊香案云打破琉璃瓶迸出獅乳味宗風幸未衰吾道起臨濟臨濟之道已啟不知可有繼宗風者麼以杖作擔勢顧左右云若無領上座自承當去也便下座。

剃髮李淨道黎淨願居士請上堂雲窩幾載學癡愚兩鬢鬢鬆懶剪除今日寸絲無礙處翻身直上法王居顧左右云如何是寸絲無礙句良久舉拂子云若道拂子無礙耳聞眼見錯過多矣若道拂子有礙放下拈來通身由我且道不有不無畢竟如何諸仁者向深深行履處急會寸絲無礙若得寸絲無礙踏毘盧頂[寧\*頁]有分復舉肅宗問忠國師如何是無諍三昧師云檀越向毘盧頂上行國師此語仔細看來人人只解貪高不肯放下何故不見祖師道震旦國中無別路要假兒孫腳下行下座。

糧憲慈觀陳善人請上堂士問弟子護關三載請問關內事如何師云灰心及第進云關外事如何師云聖王有道野老謳歌乃云為因出世緣隨事立賓主不落套頭禪養成戴角虎諸仁者珍重腳跟行中途莫莽鹵山僧恁麼告報也是憐兒不覺醜還有善識機宜能具正眼者麼有則風雲聚會虎驟龍驤又是中興臨濟苟無其人各請照顧眉毛向上進步復舉七賢女遊尸陀林一女指尸云尸在者裏人在甚處去一女云作麼作麼諸姊諦觀各各契悟感得帝釋散花山僧今日舉揚箇事不知復有契悟者麼豎拄杖云看取木上座要悟便悟又待何時復卓一下云諸弟兄悟即毛端吞巨海始知大地一微塵下座。

解制鎮臺王公設齋請上堂八字打開當陽獨露孤迴巍巍更無回護眾中可有恁麼人麼問千峰頂上百尺竿頭獅子未出窟時如何師云聞著腦裂進云已出時如何師云見者皆喪進云總不恁麼時如何師云石虎產個兒不用莊五彩問選佛場開凡聖交參以何為人師云上前向汝道進云退後如何師云可憐生問如何是臨命終時一著師打云須常於此切乃云解制機緣本無言句抹月披風隨緣去住唱出無生曲打動禾山鼓箇箇入圓明不傍他門戶今朝成滿散盡作獅子舞他日出頭來各作一方主福利於檀那宗風超佛祖下座。

王子秋解制謝客畢有羅氏妙德施大羅木祖地宰官居士咸集請師開建黔靈山於廠地陞座卓杖云古人道鋤頭是塊鐵終日手裏捏挖出一輪池現出天邊月此是古人開池種月發明本地風光山僧今日開建黔靈又則不然以杖作掘地勢云一鋤天清地寧二鋤家國興盛三鋤信施檀越增福延齡四鋤在會緇素無明頓破煩惱永忘人人圓明本地風光契悟真如實際燈燈續燄祖祖聯芳永作龍天福地共建安樂道場且道還有向上一鋤是什麼人掘得以杖向空掘云脈發黔靈世代昌高風千古聲流遠即日撫臺曹公同司道文武宰官甚悅共曰可為佛地捐俸修建禪林於季冬告成請師入院。

山門 獅子特來居此地法王法令又重新今朝踏入安閒戶慶祝皇圖億萬春。

佛殿 一身應現百千身道化無方誰比倫金不博金終始貴眼中童子面前人便拜。

方丈 獅王踞坐象王回最上玄關洞徹開斫盡釣竿心未歇道明千古貫三才。

上堂舉智者大師誦法華至藥王品是真精進是真法供養如來頓見靈山一會儼然未散以杖擊香案云大眾諦觀靈山非遠今我大中丞曹公及闔省檀越以菩薩法供養如來且道與藥王昔年差別多少若人於此會得則靈山一會儼然未散其或未然更聽一偈靈山付囑久知音六度齊修般若心功德林中功最勝泰山永峻海彌深。

說戒上堂雪積千山玉關河萬里清心光無可比推倒戒牆行何以故事同一家理源不二得無漏學戒定慧具汝等還識菩薩心地法門麼撫尺一下云諦聽諦聽遂說戒下座。

元日上堂問昨日舊歲今朝新春如何是法王新令句師云一擊春光枝上破進云離棒又如何師云和風吹物遍天涯乃云高高峰頂春山秀麗身清淨深深海底煙水潺湲舌廣長了明者隨處方圓無人無我好者故生枝節言舊言新且道既無新舊今日作麼生慶讚良久云萬方歸至德春綻不萌枝。

因僧掩關陞座卓杖云此是監院設齋為法姪掩關但不知伊為生死無常掩耶為般若文字掩耶若是此心未了發憤掩關正好向山僧捧頭喝下一



斷一切斷一圓一切圓又何須三年作限千日為期無繩自縛若不能直下承當徹證且聽一偈視聽雙收且學癡伐毛洗髓莫留疵等閒摸著無曹鼻倒壁推墻任所之喝一喝下座封關云生鐵鑄脊白醜生口優曇火裏開直待三年後。

李鎮臺請上堂問法筵雲集正冬天獅子門庭百獸潛向上宗乘即不問今朝獨步孰為先師云目前無異景瑞雪滿高原進云好箇冬景肅靜消寒如何是春景師云陽和雪消去花鳥盡同春乃云天花散彩錦繡山川雪滿千山孤峰獨露若是個得本還源漢步步踏來路不差古人道青青翠竹盡是法身鬱鬱黃花無非般若今日翠竹已成玉竹黃花變作瓊花值我鎮臺同眾宰官踏雪登山皈敬三寶慈悲心與忠貞心將軍面與菩薩面且道是同是別良久云紅爐烈焰英靈客白雪寒冰佛祖心。

寶官堡眾居士請師開建寶筏禪林師到於廠地陞座士出問師登法王寶座還是為人為己師云無鬚鎖子兩頭搖士停思師云何不進語士擬進師打云落二落三乃云雨飛花石點頭一句無生曲詠出萬年秋一月皎眾雲收亭亭不動步更上一層樓大眾於此會得便知善財童子於福城東際大塔廟前初見文殊即得根本智目今合會檀越於此廠地前初會山野亦得根本智且道如何是根本智豎拂子云會麼良久垂拂云一智含千古長空月正圓下座。

乙丑冬寶筏林工竣上堂最上一著箇箇聞之皺眉正令全提人人見之喪膽若是伶俐漢銀山鐵壁直須透過掉臂而去懸崖撒手絕後重甦穩坐家邦所以祖師一字法門海水濡毫書之不盡吾家切要宗旨單刀直入猶落二機所以善住天子白文殊言可共俱往如來之所咨受未聞亦同此時如法問難文殊云爾莫分別取著如來天子云如來今在何所令我莫著文殊云祇在目前天子云若如是者我何不見文殊云爾若一切不見是名真見如來天子云若見在前云何戒我莫取著如來文殊云爾今見前何有天子云有虛空界文殊云如來者虛空界是故虛空界者即是如來此中無有一物可分別者師云文殊可謂明珠暗投天子可惜不會別寶若是山僧則不然待他道虛空即是如來直須一喝何故響一喝虛空皆粉碎看渠何地可容身下座。

四月八日淨月李居士請上堂雲飛霧捲雨花浮壽域無疆億萬秋只為其中關捩子至今說著鬼神愁大眾且道山僧所說何事莫是天上天下唯吾獨尊耶莫是拈花微笑不容思議耶古人又道言佛住處龍天喜無僧說法鬼神愁且道說也愁不說也愁還是說的是不說的是良久舉拂子云會麼若能會得唯吾獨尊也在這裏可以說可以不說其或未然黔靈與諸人傍通一線去也以拂子拂一拂云打開無縫塔金光處處流。

康熙甲子秋白檀越請師入滇為埽九峰開山靈和尚塔受。

欽命綏遠將軍蔡公設普齋請上堂靈山七十代傳法最上乘太白綿燈焰宗風貫古今眾中可有貫徹古今替開山和尚出氣者麼問靈光獨露迴脫

根塵但離妄緣即如如佛無妄可離無佛可即和尚還有何法示人師云清風匝地月映寒潭進云二大護法差官於山設供畢竟有何祥瑞師云金梁玉柱共聯輝進云和尚埽塔與古靈揩背且道是同是別師云無孔鐵笛兩頭吹僧禮云今日親見和尚師云逢人不得錯舉問九峰堂上虎踞龍蟠千里埽塔祖道重光如何是重光一句師云有山皆鳥語無樹不花香僧喝師打一拂云你再喝看僧又喝師又打一拂云逢人莫亂統乃卓拄杖云欲報師翁德聊通拄杖間打開無縫塔請出赴齋筵今日不肖將借須彌為座豈如先師翁之無為法空為座坐甚安穩欲借日月為燈豈若先師翁之常寂常照為燈明照千古凡我後代兒孫傳之無斁門庭興盛可佐王道昇平實深幸焉如西識業師現住白雲禪院自卓錫以來枯淡不關於心始終不渝其志有此堅確不磷之操繼先師翁之芳躅亦已足矣不肖曾於明末烽煙之際在黔陽初晤劈頭一拶截斷萬緣做到今日水清月現方思截斷之機說什麼陝府鐵牛所以不憚千有餘程自黔徂滇禮師翁遺塔此亦風木餘恨之悲思也幸我制憲大司馬垂青法道惠以財施羅珍作供自是福德流馨螽斯衍慶即今更拈瓣熏觸師翁鼻孔俾現在法會緇白見此一段真風播揚於今惟烈寂光三昧磅礴蒼霄復卓杖云白雲常望九峰巔匍匐前來為雪冤老樹有枝橫蔭地清風相送率陀天喝一喝。

撫軍王公大檀越次日請上堂卓杖云閩外提封世外心懷柔六詔澤民深恩霑泉石法門盛彩鳳翩翩下玉音顧大眾云諸昆仲且道是大金湯恢弘祖道致斯嘉祥且道是先老和尚寂光發燄感斯珍供復卓杖云向者裏會得河嶽鍾靈生甫申而弼景運天人協吉演法化以翊皇圖幸我撫憲大中丞惠澤旁敷德被過現山僧登此床激揚宗旨先拈此一瓣香聯貫古今瀾漫上下令見者聞者轉煩惱為般若融世智作真常將一莖艸成丈六金身將丈六金身作一莖艸庶不負檀越願力祖道重光驀拈拂子云即此夏日舒長熏風匝地荷池泛綠艸之輕麥隴吐金莖之秀原野茵鋪錦繡丘陵花燦珠璣者段風光宜人不少雖則天地妙化抑乃觸目菩提仰願大中丞甌卜日下玉燭增陞因齋慶讚扶道弘揚復卓拄杖云暫從此日酬高厚明朝伴我度煙霞下座。

撫軍王大檀越率文武尊官於五華禪寺懸額請上堂天生良佐輔皇圖海國枚寧聖教敷金鼎調元宣至化龍章蚤徹太平符額標梵剎垂今古浴日光天壯佛都今日乃我大中丞王公結人天緣舉殊勝典不惟法門生色兼使西來大意的體全彰正道護佛道常興祖風翊皇風永扇務能直下承當了明真際庶不負大檀越之勝心也復以拂子點一點云憂國憂民大家臣焚香頂祝護生靈河山一統扶王化四海謳歌處處春。

浴佛上堂王宮一降指天地漏洩郎當式太過只為當年行七步而今遍地走禪和下座。

康熙丙寅冬大中丞慕公同司道文武尊官請就本山結制糧憲傳母請上堂拈香祝聖畢選佛法場特地開一塵不立絕安排龍潭知有金鱗客重整

絲綸上釣臺以杖作釣勢云有麼問太夫人從不思議中來山辦齋未審以何法濟師云萬里日昇光炯炯普天露澤雨濛濛進云意旨如何師云雙棹別波遠眾星尊月明問登寶華王座提玄要宗旨如何是第一玄師云千斤鉢子藕絲縣如何是第二玄師云泥牛海底眠如何是第三玄師云一枝無羽箭透過萬重山如何是第一要師云木馬嘶風過江隩如何是第二要師云石女巖前笑如何是第三要師云一面無腔鼓鼕鼕天下鬧進云幾年不打靈山鼓今日相逢下一椎師云金風吹玉管那個是知音乃云玄機獨唱凡聖掃除妙諦融通祖師機正三要三玄向上全提用棒用喝掀翻窠臼須要言前薦取直下承當洞達本源了明大意到此信手拈來無非諸佛境界施為動靜盡是祖師家風自然隨處作主遇緣立宗其或未然不免九旬作限三月為期令人人轉凡成聖作獅子兒即如今日大中丞同眾尊官來山請法演最上乘且祝國開堂一句作麼生道良久云時清瑞氣滿共享劫前春復舉月上女對舍利弗言諸大菩薩以般若為住師云今日糧憲傅母臨山設供種當來果且道是因齋慶讚以般若為住耶是多生踏佛階梯以般若為住耶然雖如是將什麼喚作般若良久云傾誠覆護祖重光般若常將翊聖皇利國利民兼利物應勳歷代遠傳芳下座。

大中丞慕公請上堂雲從龍風從虎聖人作而萬物睹久已飛騰上九霄現身應化諸緣主顧大眾云會麼佛以般若因應現百千億度盡諸眾生利益無邊際乾坤雖大不能載般若之玄滄海雖深不能載般若之妙日月雖明不能比般若之光化育色相不能盡般若之力且道將什麼喚作般若卓杖一下云諸昆仲於此會得便知般若應用不盡其或未然山僧別通消息去也復卓杖云上方太微星映臺中之柏人間青瑣霜飛簡上之花是我大中丞現身護法綱紀黔封軍民頌祝佛法光揚昨來翰言微布朱提玉粒供佛及僧非唯廣利人天抑且恢弘祖道正所謂種般若因得般若果放般若光顯般若智有此自在威力利濟之心令此選佛場中數百緇素各各腳跟下洞明大道應作無為之化堪報不報之恩遂豎拂子云傾誠歡意盡指日海東昇。

大中丞慕公誕日請上堂西方無量壽南極老人星壽等須彌峻福如滄海深如我大檀越慕公為國柱石忠君澤民履踐大道洞達淵源正所謂現大人相扶大法幢世出世間無彼無此今當初度供佛飯僧兼請舉揚箇事擊拂子云聞麼聞之不聞是真聞豎拂子云見麼見之不見是真見於此聞見分明則與無量壽南極老人無二無別滄海不足比其深嵩嶽不足喻其峻其或未然山野慶讚去也以拄杖卓一卓云永證金剛壽泉石遠光輝。

藩憲柯公初度請上堂佛是靈山老比丘曾將佛法付王侯斯時不昧靈山囑佛法流通無盡休座中有知無盡者麼法身不滅亙古恒在天中之天高而無上聖中之聖至大獨尊今我柯公初度良晨來山設齋供佛及僧自是靈山有願多劫熏培福星一路德庇黔黎今日黔靈因齋慶讚一句又作麼生良久云壽域不離功德海福星全照聖賢心。



閩臺杜公初度請上堂人人有本無字曆何必外尋好時日通徹陰陽未判先微塵刹土喻難及卓杖云眾中還有會得者麼問師登寶座四眾雲臻慶祝一句作麼生道師云一炷香煙全體露壽山福海兩同增進云恁麼則祿位高增常有慶福壽綿綿不計春師云還有向上事在乃云最上一著千聖不傳一念萬年兩頭坐斷優曇花三千年一現壽椿樹八千歲為秋且如檀越杜公都制黔疆軍民歡慶夜戶不扃口碑載道惟此德政與佛政渾同仁心與佛心不二令現前四眾均沾勝利同超有漏得證無生且如何是無生句豎杖云蟠桃初熟候壽量等虛空。

撫標大廳熊公請上堂不隔雲泥事最奇法幢扶豎在今時同緣未失靈山願歡會原來是舊知問昔日僧繇畫龍為什麼不點眼今日特請和尚點師打云點僧禮退問暗室千年一燈能破如何是一燈能破師打云破進云從此光明照十方師云切莫認光影乃云聲名不虛文武才能分閩外法門興盛人天福利現庭前有時單刀直入貼體承當有時擒縱自由不勞餘力如我副臺熊公現宰官身行菩薩道真際則理事全彰世法則恩威並著貴筑四方無遺燧黔江一派不揚波今日臨山設齋供佛供眾可謂不忘靈山願力廣令法道興揚卓杖云起起干城古佛顏傾心護法到寒山頻將一鉢調羹味分作諸方五味禪下座。

操司胡公請上堂瑞氣祥光紅日照龍象繽紛皆妙道一念澄清萬象同檻前好鳥和音報諸昆仲且道報箇什麼他道曾記靈山舊願還來供佛供僧施受雙明因果在宰官心是祖師心下座。

城守中軍安公請上堂金剛捏得鐵成汁六味調和細細炊辦出精饍三德供天人同享慶香麋化城路穩還源日宦海波清見性時大眾各堅精進志場開選佛煉獅兒下座。

省參禪師請上堂坐斷禪河水不通其中把定透源宗斯時憶得龐公事吸盡西江證大雄問透網金鱗以何為食師云食且置你可出得網麼僧喝師云未透在僧拂袖歸位師云猶是尋常漢乃拈拂子云大眾見麼此是靈山得來少室拈出提起同克塞天地放下則海晏河清鐵樹開花紅爐片雪無陰陽地上題名空劫以前薦取綱宗妙句擬議難陳不二門中千聖杜口所以摩竭掩室初祖面壁罕遇知音復舉長慶云萬象之中獨露身為人自肯乃方親昔時謬向途中覓今日看來火裏冰諸昆仲古人躬行實踐見道之語黔靈亦有一偈使得時辰獨作主娘生鐵面的親睹揚岐昔用三腳驢今日翻成戴角虎當陽把斷獨稱尊野狐屏跡無方土。

威清門眾居士請上堂問大地眾生俱是客能有幾個到家鄉請問到了家鄉有何祥瑞師云金鳳夜棲無影樹玉峰纔露慶雲遮乃云清虛常寂靜不動遍河沙德比天高覆人間共一家如斯境界是什麼消息若道即心是佛未免矢上如尖若道非心非佛猶是揚聲止響舉一不得舉二放過一著落在今時萬象籠罩不住千聖拽不回頭畢竟作麼生道良久云輪王全意氣寶印自然尊復舉傅大士與武帝書云上善以虛懷為本不著為宗亡相為



因涅槃為果中善以治身為本治國為宗天上人間果報安樂下善以護養眾生勝殘去殺普令百姓俱稟六齋此書千餘年來無人舉著黔靈今又不然上善拼命必死壁立萬仞懸崖撒手及第還鄉中善寒爐煙絕冷灰豆爆親知下落下善步步踏著實地直待花發果成名雖有三其理則一遂揮拂子下座。

廣東街明魁黃居士等請上堂問如何是黔靈境師云主山高案山低進云如何是境中人師云一縷香煙起龍象盡瞻依乃云冰清霜冷乃佛祖之門庭日暖風和實傳心之要訣山光人境盡是天機花放鳥啼無非妙用所以龐居士云我自無心於萬物何妨萬物常圍繞鐵牛不怕獅子吼恰似木人見花鳥木人本體自無情花鳥逢人亦不驚心體如如只者是何慮菩提道不成試問諸人如何是如如處識得如如即心是佛何妨貿易迎賓待客坐塵勞內修證菩提正所謂放下屠刀立地成佛拽拄杖下座。

淨祥蘇居士率男麒生請上堂問善財參遍處黑豆未生芽因什麼不生芽師云江國春風吹不起進云一般根在土各自等時來師便打乃云當陽獨立斬斷根塵東土西天遞相授受所以百丈祖云但了妄緣即如如佛如如佛者今在山僧拄杖頭邊放光動地亦在汝等諸人面門放光動地是汝諸人會麼卓拄杖云覲面非他物現出自家珍下座。

淨尚陶居士母難請上堂因地一聲卻也奇六門齊現不能遺而今雖到乾坤老猶是當初舊面皮方纔登座雞叫鴉鳴正合因地境界卓杖云諸昆仲還知落處麼若知便見三世諸佛歷代祖師俱在拄杖頭邊大中現小小中現大多中現少少中現多權中現實實中現權一為無量無量為一匝地普天內外包括未生前已生後真然不變如我淨尚居士之壽若比南山東海皆世間之壽卻有不睹不聞不變之壽一句作麼生道金剛無量體何啻八千椿下座。

印川後堂請上堂千載奇逢在一朝了明大意始全超雖然踏著還源路及至深深更寂寥所以道祖道長遠久受勤苦乃可得成若既得成舉足便超千聖外大千世界一毫端舉拂子云大眾還見一毫端麼入水方見長人下座。

穎川松巖二大師請上堂巖問如何是黔靈境師云翠柏當軒陳祖意梅花破雪露陽春進云如何是境中人師云寂然青松下歌謠賀太平巖禮退師乃云本分宗乘越萬機一塵不立絕思維明明歷歷無邊際非佛非心又是誰又是誰卻也奇認著原來不是伊即今人境分明句翻身踏倒五須彌且道是甚麼人行履處良久云祖師心印鐵牛機。

黔靈赤松領禪師語錄卷一終

憨拙禪師請上堂明月照溪山渾如玉一團到頭終夜度任運不離天所以古德云但得本莫愁末如淨琉璃含寶月若能解此如意珠自利利他終不歇大眾看珠與月相去幾何良久以杖擊香几云忘時如驀路一舉在眉邊。

劉檀越請上堂卓杖云把握機關定寒潭徹底清懸崖撒手處大地坦然平諸昆仲汝等既稱參學畢竟要到撒手休歇處坦然平穩處若或未然直須發大精進剔起眉毛看這休歇不下的是什麼人若得漆桶底穿冷灰豆爆方能契悟真常不見阿那律前劫飯僧供毘婆尸佛後感九十一劫最富無比傾囊隨佛出家證阿羅漢得天眼通觀三千大千世界如掌中庵摩羅果且道檀越今日來山設供種人天福畢竟何感良久云福祿樓中坐更上一重樓。

林淨從李淨常黃淨全眾居士請上堂堂坐斷千差路迴出無方第一義直下透明極則事如來鼻孔共出氣摩尼珠人不識八臂神王見不及如來藏裏現收得要使兒孫俱委悉三世諸佛於中齊現天人群生從此流出一處明得透得千處萬處光輝到者裏又何須受記所以道若能親切證無刻不現前。

結制都閩杜公請上堂久不陞堂打葛藤口頭生醜手如冰今朝無那冤相聚爐鞴重開禍又生且道還有不受煅煉者麼良久云一步踏翻海底月眼前何處不分明。

元旦上堂拈香祝聖畢乃云春王正月化被寰中化有餘天子萬年籌添劫外籌無盡綿亙千秋萬古充滿匝地普天豈惟民物增輝抑且山林共慶法輪隨世轉轉處即為真隨緣認得性無喜亦無嗔雖然山僧恁麼告報卻有凝然不變新舊不分底一句作麼生道良久云向下文長付在來日下座。廣東街楊梅居士等請上堂當陽有路人皆曉觀面相呈已見真萬象之中藏不住到頭終露舊時心古人道無法可說無道可傳因甚得到今日擲拂子云花開鐵樹結圓果只要親從得處來。

陳士衍居士為母壽請上堂果熟蟠桃日金母摘將來獨受人天供千春到法臺諸昆仲陳居士為母設供正合祖師門下奇特事圓陀陀光燦燦世界包得麼淨裸裸赤灑灑乾坤收得麼若或不會黔靈有佛法大意快問將來士擬出問師便下座。

松月上座請上堂抱骨藏龍種披肝觸聖胎勿言容易得出自痛腸來眾中有識聖胎者麼松月問清平世界和尚披忍辱鎧執吹毛劍向甚麼處去師云一鏃破三關進云關破後如何師云大家同唱太平歌乃云昨夜寒風透我懷滿天星斗入眸來山中理事惟心印世路回頭顯智才情知適遇還元

地快便飛騰踏佛階披忍鎧破三關有時翻作獅子吼一輪明月照松端召眾云者事且置超情離見一句作麼生道傍僧喝一喝師云未在良久云木人撫掌石女謳歌下座。

上元日淨敵劉居士請上堂元旦初過又上元朗然一月印中天好箇未生前句子了了分明在目前上方本自光明滿世界有時月半邊今日黔靈移到此人間天上共團圓人間天上既同圓普天匝地萬象森羅十聖三賢四生九有無有不同圓者且道圓箇甚麼便下座。

張淨輪莫日贊請上堂祖師玄眨眼已過萬重山諸佛道直下委悉方始妙太阿在手任縱擒高懸古鏡當臺照諸大眾會麼其或未會黔靈打葛藤去也舉昔有一僧居靜一日行入市肆受官齋於清風樓見四野清新忽然開悟作偈云清風樓上受官齋此日憑臨特地開始信普通年遠事不從蔥嶺帶將來諸大眾汝看此僧悟後眼界迥別若無蔥嶺帶來安知有向上一事今日張莫居士設齋請山僧陞座敷揚個事還有蔥嶺意旨麼卓拄杖下座。

芳斌朱居士請上堂拈拂子云信手拈來無一塵萬緣撥盡了虛名渾身放倒梅檀樹遍界馨香不可聞所以黔靈者裏不比諸方譬如深澗淵泉一任諸人取用不盡若或不然揮劍斬開人我易推山塞斷是非難下座。

上堂吾言極則事任物取難同更有玄機旨頓忘塵劫空塵劫空是名無上真三昧舉拂子云大眾會麼於此一毫端上會得即是一行三昧千處萬處應用無窮正是無邊剎境自他不隔於毫端十世古今始終不離於當處且問大眾阿那個是當處喝一喝云吼聲振破無明窟曠劫塵勞當下消。

傳居士請上堂法道之門無二路參尋不怠自心開若人親解懷中寶亦是靈山僧裏來所以教中謂譬如有貧人行至親友家親友大捨心施與珠無價貧人得此珠其心大歡喜汝等各有無價寶珠若能尋覓得見則百劫千生受用不盡豎拂子云會麼一段家珍休外覓原來行坐不相離。

致中禪人請上堂豎拂云南山起雲北山下雨識得不為讎案頭舊帳簿今日是致中禪德千里來山具戒請黔靈陞座亦無可說若道說法法本無說若道傳戒戒本無傳但於心外無戒戒外無心但動思惟即為破戒所以古人道等妙二覺即破戒凡夫還委悉麼垂下拂子云克己還天理方成大丈夫。

汪德鑄馮德士重修三江橋工畢請師踏橋夾岸溪聲卻被長虹鎖住三江渡口任從人物往來青山疊嶂盡知音綠水層波皆息浪萬載堅如鐵鑄千秋永鎮金剛數與乾坤久壽同天地長今來修橋眾善各發信心共結善果請山僧陞座拈香祝 國利生伏願諸佛菩薩山川社稷神祇庇祐橋梁永固眾姓福壽綿長如持地菩薩歷劫修培橋路永證無上菩提眾善構此新橋功德無二人人穩步安詳各各腳跟點地卓杖云一派溪流截路遙長虹百尺鎖江濤下座。



藩憲柯大檀越臨山上堂瑞雲開紅日照花雨繽紛合妙道一氣鈞陶萬象同頻伽和雅簷前報諸大眾且道報箇什麼若道報高陞祿位祿位自尊若道報福壽增延福壽本有所報者心花發現復善歸元施受雙全證菩薩道且道不涉施受一句作麼生道卓杖云三輪空際莫思量虛空六合皆平等。

四月八日上堂指天指地非功勳祖祖相傳正法興不肖遠孫重慶祝互齊日月永長明。

大之耆舊請上堂祖師心印量無等直是省之復又省數百劫來在此中何緣今日稱登頂斯則麥浪金渾成物我識真面荷池泛綠得透清涼悟自心所以李長者閱經悟金剛不壞之體今我大之耆舊請黔靈陞座摩頂受記於一言之下悟見本真與李長者無二無別諸昆仲如何是不別處卓拄杖云一毫端上知消息偏界全身不覆藏下座。

刻先老人錄入藏上堂虛空世界口為得巨靈手日午打三更面南看北斗今日為先師未了公案命彼東下有一人長在途中不離家舍有一人不離家舍卻在途中且道是甚麼人悅眾云遠則十萬人千近則不離當處師云畢竟是甚麼人悅眾便喝師打云一人有慶萬事咸寧。

副臺王公為太夫人薦福請上堂大哉天地理深洪質秉坤元造化中曾受誥封齡百歲母儀閨節有千功養葬終身心已矣資冥幾次忌重逢是日修齋展孝意仙人脫化率陀宮下座。

嵩巖大師請上堂二諦融通天地肅靜一心清淨萬法自如若富樓那上德上行如舍利弗智足慧足昔日善財於福城東際大塔廟前一見文殊即得根本智今日嵩公初度為母披剃於人天眾前一見山野亦得根本智諸昆仲如何是根本智豎拂子云金雞抱子出霄漢玉兔懷胎入紫微復示偈云一髮落地萬法齊孤削盡癡頑方成丈夫。

請行周監院上堂譬如暗中寶無燈不能見佛法無人說雖慧不能了若道有法則辜先聖埋沒已靈若道無法亦辜先聖埋沒已靈二俱不涉畢竟如何若人會得猶較些子院便喝師云住住休得亂喝不見古人道西方日出卯雖言先夜何曾早茲因妙盡越時辰可謂當家之種草今將院事親交代存心須學楊岐老。

海雲資老人入藏錄回山上堂去年五月荷池香一葉扁舟下浙江今歲九秋菊燦爛老人錄至開生面即此流通正法眼忠孝曇花香遍界大眾更聞曇花香麼良久云不如禮錄了退。

## 小參

李居士供法衣小參衣成九日菊花新賞玩何如此事真不具頂門正法眼安能即物現全身諸大眾即物現身且置如何是正法眼豎拂子云見麼擊禪床云聞麼若也聞見分明當下契悟真常便超出一頭地也今有善權居

士回心向道參慕宗乘供衣飯僧請山僧小參叩問極則事殊不知未出方丈已前向汝開導了也復示偈云六門緊閉學無生打徹關頭見自清捏聚伸開都是我不曾借手指他人。

中秋義月居士請小參明月當空照不偏清輝萬里盡同觀須知更有光明物無減無增亙古圓擊拂子下座。

結制小參高高峰頂立深深海底行水窮山盡處方識自家珍諸昆仲今夜初入期會值山僧爐鞴弘開之始鉗錘新設之時只要棒下知歸言前領略稍有擬議便錯過了也急須剔起眉毛高著眼孔向七尺單前大死一回若得冷灰豆爆卻來方丈裏通個消息珍重。

結制小參壁立萬仞迴絕攀援透生死關掉臂而去若不然者必須別通一路始得且道如何是別通一路莫是棒喝交馳揚拳豎指偈頌文字麼切莫認著何以故如今浩浩談妙說禪盡是學語之流因此法門衰於日下如古德云只守玄沒文字認著依然還不是須向此選佛場中三條椽下七尺單前淨潔潔乾爆爆底不雜不想無作無為無下無高無煩無惱一念渾然純真無二兀的磕著驚天動地堪報佛祖之恩永助無為之化處煩惱而不亂居濁世而常清忍辱柔和法空為座若有如是之人黔靈當誠禮拜何故下心於一切方繼祖師曹。

閩臺杜公子請小參異域題名詣我曹學成文武識英豪喝一喝云吼聲驚起凌雲志快便飛騰上九霄瑞禎居士請小參龍女牟尼珠瑞禎火裡蓮老僧拈起看不隔一毫端今者淨吉龍居士大有善因思輪迴苦久於知識門下請參話頭能斷一切是非始終如一黔靈昔日向汝道本來面目即瑞禎瑞禎即本來面目忽地扭轉鼻頭方知不受人惑偈曰一念純圓現瑞禎絲毫不昧合天心依吾指處行將去何慮菩提道不成。

入新方丈小參把定機關風不透到無功處卻成功功能盡盡無餘事入此黔靈寶社中今者藏閣功成新人方丈黔靈入此室坐此座與人抽釘拔楔解黏去縛諸人到此入清淨琉璃之地消歇癡狂之疾舉拂子云會麼若會盡大地是黔靈丈室於一毫端上現五須彌其或未然也須高著眼始得良久云竹月千竿靜荷池萬里香。

撫臺公子曹澧曹汧請對靈小參補天浴日大功休一片丹心仰御樓萬里滇池今鼓浪以身死國有來由曾聞老先生受命撫黔日。

聖天子親諭云卿去撫黔學王陽明行事陽明乃道學先生也報國勤王勒名鐘鼎今澹餘先生處虎穴之中當孤危之際雖未能恢復社稷期一死以全大節臣道無愧矣今公子扶柩還鄉請為小參想先生盡忠愀忘生死報君親取仁義山野到此任倒腹傾腸言亦難盡豎拂子云諸仁者看看澹餘先生在拂子頭邊活鱗鱗地看他生亦不曾生死亦不曾死生死兩俱捐跳出風塵裏放下拂子喝一喝云千古一朝真際印當來仍在肘中懸。

趙學臺公子請為母對靈小參人生宦海樂安然皎皎孀星世共瞻只為從前遺澤重不由人物泣昊天祖師云葉落歸根來時無口今日為恭人趙母

又則不然葉落果成存亡雙固四德全歸長年裕後大眾還知有不生不滅處麼喝一喝云喝惺從前大夢了明生死無干恭人<sup>已</sup>登仙界永錫瓜瓞綿綿。

李鎮臺請為母對靈小參關東毓秀滇南居坤道全圓復善歸只為孝思無限盡吾於目下決悲疑今有鎮臺太夫人三從不缺四德全周善始善終光宗耀祖含弘柔順閨儀可法真所謂得菩薩道證悟真常唯我祖師門下向上一路直指超化去也乃打靈龕一拂云離諸苦趣超塵世重甦大夢上天宮。

藩臺柯公起棺小參卓拄杖云大哉忠孝最為先惟有柯公<sup>已</sup>了全卓杖頓消塵劫夢真光直上紫微垣今有大檀越玉鉉柯公精忠報國慈惠愛民享年古希飄然辭世今日幢幡濟濟法樂雍雍兵民遮道慟哭震天可謂一路福星未去萬家生福常存黔靈到此指示津梁亦無別說曾記公在生之日與黔靈敘道為官偷閒可參禪否黔靈向道公能忠君澤民無處不是禪之妙用如古人云公事之餘喜坐禪未曾將脅到床眠雖然現出宰官相長老之名天下傳今日公雖化去其與黔靈聯席論道把臂談心一段靈光了然在目不隔絲毫雖然更有第一義諦無生法忍為我公指出去也以杖打圓相云寂靜光中無去住高超劫外任逍遙。

為提臺侯公對靈小參天生名世鎮南紀令肅貔貅通大理<sup>已</sup>現將軍說法身世緣雖盡何曾死教中道緣從因生因從緣脫因緣盡盡涅槃為樂如我公侯大檀越為國柱石胸藏數萬之甲兵文武宏才倚重黔南之保障行有餘力則以逃禪參究本源了明大意雲泥不擇平等施仁今則官居極品壽近七旬福德兼優怡然坐化善始善終保名全節正所謂因緣盡盡涅槃為樂道德流芳又何曾死大眾大檀越既未曾死且道在甚麼處良久揮拂子云一登離垢地遍界現真身。

王鎮臺官男請為母對靈小參揮拂子云先天地而生生而本有後天地而老老而常存要識還源真實意於今燭照甚分明今者王母汪氏之靈生於北地辭世南黔德全坤順內助有先生則母儀南國沒則冥福無疆黔靈到此別無所說香煙起處直透有頂之天頓超無垢之地喝一喝云消融萬劫無遮障灼破莊周蝶夢長。

為臬憲曹公對靈小參任居兩載幾臨山恩澤軍民草木霑不但野人評價重聲名載道口碑傳恭惟皇清誥封通議大夫貴州提刑按察使司素徵曹公下車兩載德政恩寬心同杲日恩重如山正好護教興隆不料仙遊今詣靈前說片言以酬厚德以拄杖于地劃一劃云劃破幽暗之地向空擊一擊云擊開有頂之天我言不思議公入九臺蓮。

嵩巖大師請為母對靈小參花開世界果成時莫大因緣任所為惟有不傳真妙訣鳳凰產個俊獅猊者事且置且道寶庵覺靈向甚處去莫不是如月上女對舍利弗與麼去耶又如七賢聖女遊尸陀林契悟真常而去耶臺山



婆又恁麼去耶若恁麼多說總不干他事只如脫卻殼漏子向甚麼處去良久以杖擊棹云擊開無縫罅托化清涼天。

## 示眾

糧憲傳母延師主席閱藏示眾云一法流通天地人物皆有此三乘設化昆蟲草木盡霑欣鑄十聖三賢運轉四生六道石聽點首蠢動聞昇萬象之中迴然獨露且道是甚麼物有此奇特揮拂子云諸昆仲向者裡道道看良久云其或不然又別開一路去也今為糧憲傳母發最上善心種當來福果延諸山昆仲命黔靈主席翻斯三藏靈文共閱一乘妙典斯乃秋風肅靜金萼天香大家猛著精彩又非摘葉筭沙必要欣翻海底踏倒須彌現出心藏寶珠照天照地倘或如是則糧憲傳母福田實種諸昆仲功不浪施且道功不浪施一句作麼生道擲下拂子云萬頃福田純玉種一聞千悟證菩提。鳳凰山示眾杖笠披煙到鳳凰蒼梧翠竹列成行深林移得清風下能使人心徹底涼諸仁者會得當下清涼越大苦海如若不會烈燄炎天關河有礙。

春雪示眾春行冬令十分寒萬壑新開一洞天隔斷紅塵純玉界精修白業冷冰禪風情本分惟疏淡日用真常守道堅鐵石心腸孤峻坐要人直了未生前諸大眾如何是未生前事良久云穿衣喫飯無他事出入分明識得渠。

午日示眾世間有五毒未若人之口物毒傷肉皮口毒盡形朽所以我幼時為看人毒醜逃名梵侶中逆轉虛空走深得普賢心文殊作契友我無傷害心彼毒復何有報諸學道人珍重規繩守不見岑大蟲仰山遭一口。

示眾學道人朝參暮請不得怠墮若怠墮則埋沒己靈輪迴難出大抵佛法最有靈驗昔有僧聞法華經至諸法從本來常自寂滅相大起疑情萬緣頓息數日林中經行聞樹間鳥語有省續云諸法從本來常自寂滅相春到百花開黃鶯啼柳上如斯親切方見佛法靈驗爾等各宜痛念生死勇猛精進急早打徹不枉在祖師門下若不然者更聽一偈白晝閒家計青山無變異翻然亂石中迸出一團玉。

示眾向在修造人多懈怠殊不知在作務中無有不是者豈不聞龐公道神通并妙用運水及搬柴說遠人猶難信近時天童密祖專以作務為佛事於作務中得大神通得大自在若於己躬下事生死關頭不肯痛切正是業識茫茫閻羅老子與你筭飯錢在。

示眾人生百歲猶如剎那相似宜各精進研窮道眼若道眼明不枉辭親割愛入此門中若不飽道為務恁爾詩文錦繡偈答如流俱是業識若更懶墮偷安無明煩惱貢高人我頃刻即是來生換了面皮縱悔遲也珍重。

中秋示眾雲開玉鑑掛中天萬類同觀照不偏一道寶光無缺減人間只解說團圓。

## 示眾(十二首)

菩提一念推心起社稷山河俱照徹況乃山河一念通精誠吾道何愁得  
萬仞懸巖常壁立幾經鞋破腳頭穿轉身納履重登上伸手方知掌是拳  
若人行路未曾到萬象森羅齊發笑一個灰諧當下休明頭顯合暗頭竅  
傾蓋相逢事最奇剎竿扶起在今時三生自是同悲願異地還來話舊知  
學道之人要識真無真念必不平沉身心平得極乾淨魔佛齊來是故人  
黑漆圍屏沒亮隔百千神用難開拆翻然打破上頭關日炙風吹壞不得  
一朝生面萬年同此日分明色相中底事雙忘別具眼任他萬紫與千紅  
奈何貪惜事朦朧退卻一重又一重可憐晝夜催歸鳥啼得通身血染紅  
分明佛法世緣邊只為時人兩樣看未動機先能薦得方知火裏出金蓮  
六根清淨更精勤一念渾然超劫塵莫向外邊尋佛果單求自己本來人  
參禪極則取先天一落二頭便遶纏石火光中能辯取不勞蝸角轉三千  
乾坤收在一掌中放出圓明滿太空而今不知何若此看來天地體皆同  
黔靈赤松領禪師語錄卷二終



法語

示大中丞王公

乾坤世界廣大而撮來只一粟米許萬象森羅歷然而始終不離方寸其理包括妙義無窮若向外求轉覓轉遠祇在一念回觀恬然肅靜所以祖師道識得一萬事畢且道如何是一○還識者個麼若要識此必須將從前學解一切掃除勇猛精進晝夜恒持行住坐臥之間語默閒忙之際應事接物渾融一片方為正念現前豁然磕著本命元辰與佛祖不別一毫端上現出莫大世界將莫大世界收攝在一毫端到此不守禮而禮立不著義而義存不施仁而仁就不舉願而願成正所謂坐塵勞內轉大法輪君親之恩俱已報畢方可坐進斯道。

示我和關大檀越

昨在街頭無向背處上石磴之時偶遇大檀越延於府中齋茗坐談正是威音那畔傳佛心印之知己也黔靈久處山中少入市肆罕遇知音今朝恰遇奇人正合祖師道逢人即不出出則便為人故書一偈以表前緣驀路當陽踏磴時三生有幸不曾移獅王乳滴琉璃界迴契真風一段奇。

示西星白檀越

吾佛說法四十九年末後拈花飲光微笑將正法眼藏付囑又囑梵王帝釋國王王子大臣皆護持正法自此祖祖相傳到黔靈七十整代矣常念德微任重恐不足承當大事今遇大檀越忠正賢明同護正法現將軍身行菩薩道故贈偈曰從天降下有元因福祿綿延道德清信手拈來渾是玉福星原是舊長庚。

示翁檀越

天地同根萬物一體只為因循歷劫生死欲了生死單求自己能妙悟則照破生死之關知根源而應化塵寰之主倘能如是即吾教外別傳之心法也其或未然必須十二時中將此身心返觀內照凝神定慮一念不生不出不入密密綿綿打成一片渾然貫徹本地風光照天照地方知是我不是別人

到此四恩盡報忠孝兩全偈曰精勤不怠始參吾歷歷常懷舊約初有日大開塵夢眼翛然記蒨祖師圖。

### 示知參魯居士

往幸入吾宗精勤下苦功靈符生掌上千里卻同風因有知參居士精勤向道將吾舊作偈子書為箴規修為何必判西東前念全除後念攻一步踏牢真實地萬緣屏去聖凡同無功用處超生死但有絲毫受蔽蒙不落兩重親切處大千沙界盡圓融。

### 示昭然禪人

心覺昭然本潔白纖毫念動即遮黑人言片雪點紅爐我道紅爐出片雪豁地昭然離意識好看公案百千則百千搜盡玄窮處賊在何愁拏著賊。

### 贈閒菴淨敵居士

彌陀終日相對莫教塵勞遮閉修持善念一分解釋惡因萬倍塵塵剎剎等觀了了明明不昧摸著閒菴鼻孔恰是先天一氣。

### 示佛燈禪人歸里

忠孝雙成一念酬能全心藏立功猷程途涉盡歸來日萬古名標轉更悠吾徒佛燈者思歸故里此去雖離千里終在師前若識得足下不涉途程之句歸來好吃痛棒。

### 示孫演密

人間事理心誠實言誠敬之至洞徹本元出一言而興立家邦得一善而挽回天地悔一惡而業盡福生有孫演密求法語吾哂之曰法可筆書乎所書者乃糟粕之言也糟粕又非可輕視之也若上志之士遇在糟粕之中捨迷入悟警惕兢業立德立行為聖為賢為千古之奇男子者若無糟粕之言亦不能入也偈曰學道之人決是非明明識得作聾癡有時踏盡窮源處萬法收歸一密機。

### 示融之禪人

融之禪人者長年真實本色無二朝暮勤勞始終如一凡事謙和有古人遠大之風因此贈以偈曰同出祇園古到今根源恰是舊時人大開積劫塵夢眼一念常存在祖燈。

### 示繼脈監院

大凡為僧無論老少貴在道心堅確不辭勞苦步步腳跟點地頭頭觸著鼻孔但於常住並已常住真心時刻不敢違有日忽然撞破骷髏血流遍地可為當家種草偈曰第一要為極則事研窮至理莫求別有朝扭著娘生鼻點滴無差可繼脈。

### 示至賢善人

有物先天地無形本寂寥能為萬象主不逐四時凋若在此處會得行住坐臥語默忙閒認得的作得主擺得脫優游自在不被天地之所轄鬼神之所拘若然如是堂堂已成大道若不如是如何了明大道。

### 示慈容善人持咒

六根精進念精勤一咒能持出劫塵莫向外緣尋佛果單求自<sub>己</sub>本來人會得本來人穿針度線語默忙閒無有不是者熱鬧場中著一冷眼無有不的當者雖世事虛假就虛假中無有不真實者設或未然借此一咒恒持降伏雜念妄想又看持咒是誰雜念妄想是誰莫管誰與不誰妄與不妄一咒恒持兩頭絕斷勇猛提撕念念在咒上密密綿綿渾成一片豁然撞破機關得見本來夫真超出物外方知自<sub>己</sub>是一個真咒又何有別咒之可持哉。

### 示碧松禪人

歷劫塔成萬壑松蕭蕭遺下滿天風與麼聞者心空第更進丹成子滿叢內有嘯風戴角虎林藏值雨老虬龍鱗鱗節榦生枝秀奕奕輝光在此中何若能為精潔士昔時有個赤松子當年軒帝從之遊草芥公侯皆自許汝今望風到黔靈赤碧交互深有理會得千秋結果意令渠直下超生死。

### 示大潤居士

即佛即心心即佛即心即佛佛即心若能了此心中佛永鎮金剛不壞身。

### 拈頌

## 世尊初生

拈云多年我慢一時貢高怎奈有傍不肯在。  
王宮初降日眼底特空人惹得英雄手喃喃氣不平

## 睹星悟道

拈云喚卻眼睛。  
窮滴滴兮喫一驚明星入眼若真金思前想後不知是又向頂[寧\*頁]  
下一鍼

## 女子入定

三聖原來同一個各顯神通元不錯機梭暗裏逞風流千古令人看不破  
看不破師姑定是女人作不得春風花不開及至花開又吹落

## 臨濟三問大意三度被打

拈云不識好惡自討周遮。  
塵緣滌淨不知恩始到灘頭恨尚存一旦熏風撲面發歸心似箭解愁痕

## 趙州訪二菴主

拈云年老成精。  
為訪深山老古錐因之不惜兩行眉拳頭伸出難回手一釣雙雙入九嶷

## 勘破婆子

拈云賺殺多人豈但婆子。  
臺山有路不多奇一線羊腸到雪谿婆子何須頻指點被人笑破嘴唇皮

## 婆子燒庵

拈云絕人太甚。  
巖倚枯椿氣絕甦春風送暖不曾孤轉身回祿菴前坐羞殺人間一丈夫

## 千聖不傳

拈云也是周公不利於孺子。  
堂堂正正有規模莫向人前亂點汗打破鏡來相見後蒯通也教背盧都

### 鍊蛇橫古路

拈云通身毒氣。  
英雄久困在重圍氣撲簷前古瓦飛奮志沖開堅壘後翛然脫灑解征衣

### 萬仞懸崖

拈云抬頭覷著轉身難。  
左右逢原事不同斷岩若似路頭窮舉頭方見樵山徑透出雲霄幾萬重

### 撒手而歸

返魂之後話郎當雪沁梅花撲鼻香個事不須重計議一條白練任他方

### 僧問首山如何是佛山云新婦騎驢阿家牽

拈云婆心太切。  
垂言問旨答天威肅殺霜凝嚙鏃機通身精潔指人知三番無耐何癡迷  
摸且尚於難下手爭能得殼跨神騎

### 趙州一日於雪臥云相救相救一僧去州身邊臥州便起去

拈云堂堂古佛暗使風流。  
微細極清古佛才聲名千古若聞雷全機暗搭無文印趁此天花顯出來

### 閱密菴祖錄

拈云真破沙盆。  
萬丈深潭碧玉堵絲毫罅隙雲龍補翻然踢出破沙盆恰是驚人戴角虎  
戴角虎莫莽鹵斯時洞徹心源腑累及兒孫打口鼓

### 贈偈

### 贈佛燈禪人

一燈之派應千燈非比人間有暗明惟是佛燈常不滅無分晝夜照長存

### 贈慈忍禪人

偶然一見心相信甘淡傾誠苦亦隨貴使堂中安地步齊眉共唱獅王兒

### 贈松菴禪人

戒德修持百事堅其中一路透玄關有時水乳情相合好立當年濟北禪

### 贈鶴聲監院

握得靈符掌上使是誰學我獅王子不由說出驚人句萬古鶴聲親入耳

### 贈嵩岩大師

禪那戒德同條貫北若天高無物齊蹤跡藏身風雨快獅兒吼處象王回

### 贈良遂更號佛遂

根蒂不凡成大器道圓極處現良才法衰扶仗巨靈手祖道興隆佛遂來

### 贈憨拙禪師

三千諸佛吾同命物我根源不異性獨待頂[寧\*頁]開正眼廓然之下  
無凡聖

### 贈海雲禪人

實心達本不疑猜梗概生成羅漢胎綿密古今俱坐斷海雲大士又重來

### 贈大之大德

天地玄微合我機我機先貴會心師離心意識通玄旨正是吾傳遞代題  
有大之卻也奇一言之下悟心宗了了分明本不迷

### 贈大林禪人

為人莫問易何難一念精勤理自全若得當陽心地印始知月落不離天

### 贈鶴樹禪人

樂隱溪山出化城洞忘天地洞心明但餘閑鳥俱飛盡樹長成陰鶴滿林

### 贈天臺省參禪師

精誠一念為渠來功滿九旬顯佛才今日戒圓歸及第寶蓮永發鎮天台

### 示懷元侍者

妙年成聖果為有牟尼珠若遇英靈子得來志不殊只看前賢哲侍者一生圓木枕頭下忽朝摸著自家底千古令人難擬價

### 示震南侍者

戴月慙慙力披星無怨言因前花有種果得子孫賢學待心源盡好登般若船叮嚀書字囑祖道亦非凡

### 示嶽雲侍者

學道如撐上水筏竿竿不歇未曾暇一朝撐到窮源底獲得寶珠無北價

### 示寶印禪人

參禪本自狂心歇就此狂心莫放空莫放空時時放下一門路透門門通

### 示黔谷禪人

精專一念更精專透出威音一著先未踏黃金選佛地始知溪水應黔山

### 示泰寧禪人

無生句子昔存言聽說遵行踏妙玄念念不容安位分心心清淨沒攀緣渾然啞破娘生舌了達分明向上關如是塵消業盡處隨因赴感應愚賢

### 示泰然禪人

從來大道得人難忽問本來有泰然吾指目前無別法閒忙只在舉頭邊

### 勉實參禪人

幾回參我為何由想要明心貴自求只待石頭點首處豐荒不問果全收

### 示可也禪者

人生本末事終始物格之中無彼此片雪紅爐飛點到灰心一念從原起

### 勉達也禪人

古謂無心於萬物何妨萬物常圍繞既觀萬物本無心何謂無心萬物繞因在有無落二邊綿延歷劫不能了會融物我渾忘時莫大因緣非小小

### 贈悟空禪人

多年鍊石肝腸志密密精勤踏上乘今到果圓真實地直憑三昧佛慈心

### 贈寶月禪人

無價明珠天地包為因遠劫著塵囂而今親遇巨靈手徹出清暉寶月高

### 勉歸元禪人

父母生前不必問聽言只看心頭病一朝心病兩俱空即此歸元真實悟

### 贈瑞徵楊檀越

虎生一出便擒羊高駕雲程鎮夜郎只侍蟠桃果熟後酬圓功業績聯芳

### 贈龍菴居士

英靈奮志出雲泥撥轉天關換骨皮脫體全彰成大用長年樂享太平時

### 勉從佛居士

吾傳心印上乘法貴汝頭頭用最親有日踏破關捩子拈來寸寸是黃金



### 勉心宗居士

惟有法空為佛座百千萬億輪機荷驀然妙盡始終意頓悟心宗原一個

### 贈公夏詞宗

幾晤黔靈最得宜良緣培護樂天孜雲程來往非千里峰頂常懷一句詩  
是日金昆裴氏重古聞玉帶子瞻遺山頭功德修圓已藏海帆標有所思

### 贈淡也喻詞宗

朝朝染翰文林郎未獲真源過別場選佛聯燈風雨快淡之不厭悟心王

### 黽師吉居士

黑漆乾坤顛倒走龜毛繩縛一幾希如斯越格超宗句莫擬他年化鶴飛

### 贈善權居士

回頭徹去萬重雲不動絲毫現本真就裏寶珠親密證但逢鐵石點成金

### 贈淨圓善人

吾傳無別惟心印百劫修持第一功若得離心意識會恒沙諸佛體皆同

### 贈佛月居士

累劫培成大福田生生受用亦非凡世間惟有時常現佛月光昇萬古圓

### 勉淨月居士

根從多劫來立起長年志及第得心空竿頭進步地離心意識會徹透玄  
關捩即此脫危安名為真實際秘密常熏修機化鬼神懼記莚在靈山靜  
月原一會

### 贈淨孝居士

修行百劫為心地福祿受時果不差今日大年登及第向前步步是蓮花

### 贈李公大檀越

幾次踏開流水聲千重雲霧和煙掃機輪密密已精通剝盡群陰還自寶

### 示燦明居士

幾回登涉扣山廬直下了明法界圖指出目前日用事圓明自性死生無

### 贈淨敵居士

萬劫不磨真實心閒忙語默念長存一朝看破娘生面九轉金丹鏡上痕

### 示佛意居士

六根清淨越河沙天上人間共一家萬法歸來三昧印方知火裏出蓮花

### 答佛宗大德拈花曹溪意旨

吾曾入道甚愚戡廿載彌堅撥死灰不覺一聲冷豆爆何期千古響如雷

### 示瑞貞居士

如佛牟尼珠終朝常現前不知誰解得又看瑞貞緣

### 贈宗明居士

還源一事貴精誠踏佛階梯出化城今日回觀登道岸超群拔萃正宗明

### 示佛貞居士

清高尊貴佛真身返照推尋自己心尋到盡頭方轉處自明何地不觀音

### 贈紫岩居士

氣宇彌堅出剎塵真誠久植悟心明灼然放倒梅檀樹遍界馨香不可聞

### 勉修來居士

心明平地照高下萬煉千磨拆不開今日覺圓方及第大端因行有修來

### 贈靈源居士

屢劫修培相白毫因功不昧遇吾曹今朝得遂靈山約待悟靈源漾海濤

### 贈祇園居士

奇哉敦厚有規模掃盡煙塵篤丈夫非佛非心俱掃盡因斯遇著賓頭盧

### 贈大幢居士

數載相逢在夜郎廣培功行識閒忙而今已了心源意好豎師生大法幢

### 贈聖林居士

墨花潑應福多家好種心田結果花不起本來心上路清宵坐飲趙州茶

### 勉賢林居士

念頭提起時相對不比尋常身口意佛口佛心行佛事自然超入如來地

### 勗子穎居士

父母未生有大理少年之父老年子絲毫認的本來人超出無生亦無死  
因人錯解路頭差只向外尋棄自己

### 示雙林禪人

理事分明共一原此心須向靜中安了明直下雙忘處妙合如如古佛禪

### 勉慈願居士

屢劫培成般若芽人間天上共為家分明慈願歸源處花種因成果不差

### 示義月居士

本來現成最尊佛混失塵緣路上走妙法說來幾萬般機關只在毫頭守  
觀雲起滅俱無處截月橫吞祇一口我與目前無別法單求自己心王主

### 贈圓慧善人

一道圓光本不壞世間萬物難遮蓋同行同坐甚分明識得名為觀自在

### 示超元淨玉居士

本來一粒金丹種但舉心時遍界生此是吾家真密意纖毫不立現全身

### 示淨富居士

道心精進三千日不斷工夫十二時兀的踏穿方寸地終朝物物總逢渠

### 示佛賢佛悅居士

佛賢佛悅禮慈顏竭力同修不放閒只到花開結果處方名授記在靈山

### 示真慈居士

一念精勤萬事宜不容毫髮許心馳若於不掛寸絲處頓悟真宗在此時

### 贈鳴佩冉詞宗贖名

三教門庭共一和惟於佛祖有仙陀佩鳴此日還元地脫卻僧衣換紫羅

### 勉純素居士

生生不滅古心源劫劫綿延到此間今日豁開塵夢眼善揚世代在靈山

### 贈明遠詞宗

驚峰拈出一枝春發遍天涯枯木林大地忽生多有垢山河掀覆本無塵  
不聞睹處窮玄妙悟理圓時出果因無限風光微妙意善財童子向南詢

### 示靈然居士

單瓢隻杖任閤浮瓠發靈臺共一坵月映長江觀在掌風吹巨浪涌迷頭  
蕭梁蓋笠多生在漢季施樑遠代留歷劫聖賢皆若此而今標在萬重樓

### 贈昇寰居士

江海滔滔挂順帆頻來安命自歡顏一生補處惟忠直兩地名喧道義全  
紅日光昇懸竹榻清風常拂響松軒寬柔耳順蠡斯慰頓悟心王禮舊仙

### 示顯枝居士

純朴乾坤德上皇學明心法量如王當人不昧因花嚼果結功成佛日長

### 示王官堡眾居士

語默玄微不失時雙明寂照透玄機進前儘有無窮意最喜心空及第歸

### 贈來源居士

心如鍊石念如天萬事詠諧絕易難渾得生前真實意長江月映有來源

### 雜著

### 參禪偈

娘生鍊面參禪本大用通腸徹骨冷一舉頓消知見識幾回翻悟迷中醒  
不容些入如如理咂破牢關上上等如是了明真性義鷺鷥飛入雪山嶺  
參禪心實如金剛觸碎銀山不可當撒手回觀天地外安然穩坐敘空王

### 念佛偈

參禪共念佛兩處一心居了卻心頭事閨王不奈渠念佛與參禪和融一  
處看渾然方及第自在即還天參禪念佛真實坐斷兩頭居一忽然看破  
娘生輪迴生死了畢  
念佛在佛心裏動靜兩忘舉止踏得故鄉地穩方知理事圓美  
阿彌陀佛不離我纔舉念時已大差覲面回觀無念者紅爐火出金蓮花

### 掛鐘

瀟瀟頂上幾人聞火裏生冰百煉成信手拈來高挂起一聲五夜惺群生

### 布袋和尚

長年有不壞定坐三千界無奈兩莖眉缺少六子債研盡細微理其如一布袋

### 天童密祖

法王大寶現五濁世光明如百日昇天音吼若千雷震地解弄真獅中興臨濟一腔熱血向誰傾天下至今中毒氣

### 雙桂師翁

破頭山上破家私走向天童陷鐵圍不料兒孫遍天下魯戈佛日聿重輝

### 慈雲老和尚

潼川貴族王老師不愛功名世罕知七坐道場功業事幸留不肖強撐持

### 繼岐山何居士

室中垂言離卻新舊句答不屬甲子乙丑白晝午時星現黑漆乾坤倒走家家明月長安處處清風拂柳大哉將繼吾宗善護獅王哮吼

### 天童掃密雲悟祖塔

祖翁最尊最貴最上最高最深最隱最顯最明不肖曾孫到此何敢欺妄敬拈一偈以當瓣香。

歷劫法王大寶位英豪佛祖稱尊貴文明若日懸中天音吼如雷振大地解弄真獅十二奇中興臨濟三十輩一腔肝膽向誰傾獲得祖來出口氣又上香云四十餘年仰祖翁八千里路到天童香焚叩塔真空定一念消融萬劫通

### 慈雲掃先老和尚塔

高高日午猶相伴寂寂淒風歲月長陸路花香芳草綠水原本本正當陽正是慧日東昇人物普照人無酬日之德慧日無分照之私物日雙融方

合妙諦所以超梵天底事業直須拋卻全十力底事卻乃放下金聲不顧  
玉振何提因茲披弊垢衣入泥入水撩起便行一點不沾撞著冤頭方可  
揚眉吐氣堪報不報之恩永祚皇圖輔化所以不肖開山創建刊師法錄  
入藏所羈未得前來拜掃捧日丹心今日領徒到此拜掃我師塔壚諸昆  
仲如何是數千里足下不涉程塵一句良久鼓掌云須知寶塔千峰碧卻  
有雲松雨露青

黔靈赤松領禪師語錄卷第三(終)

(門人悟培 妙卓 淨玉 達意

憨拙 悟元 海進 印中

性本 深玫

弟子劉淨敵 陶淨尚 王淨參同捐資敬刻

本師和尚語錄全部 侍者德芳對

康熙藏在辛未菊月 嘉興府楞嚴寺藏經坊存板)

## 序

古人云月色靜中見泉聲幽處聞嘗試論之何處無月何山無泉而必曰靜幽者是知此情此景非塵勞鞅掌之客之所能窺而多屬於林泉隱逸之士之為庶幾耳近如我黔靈和尚者每禪餘暇陶情於聲律之中信手書信口道一味從性靈中流出意在言外無斧鑿痕又未可與詩學家咕嚕者流同日而語也門人輯其平日與士大夫輩誦唱若干首丐弁於余余目之喟然嘆曰此詩家上乘耶如曰杜韋王孟者余逆知其為俗物耳不可以語此又焉可以譚幽泉靜月者哉。

時康熙庚午歲婆達囉鉢陀月佛成道日書於古渝西葑軒中。

青城後學寢堂法秀拜題

黔靈赤松領禪師語錄卷第四

門人寂源錄

## 詩

### 夏日滇中同友遊太和宮樹下

綠樹陰濃下風來枝蕩漾瓊樓晃太清巖石疊山嶂留騎故人懷揮毫野士曠雪曲君裁成巴歌喜共唱快意適天真樂道以相尚古人陳希夷事跡猶在望徘徊不能別欲去又惆悵

### 挽澹餘曹老先生

我愛古忠臣賢哉狄仁傑身以武周羈志報唐家切豈不重捐軀國恥誰為雪一朝歸帝子日洗虞淵烈心事炳千秋生死何足說嗟我澹餘公今古同一轍北海聲價高熙世人文潔  
帝重股肱郡假以撫黔節下車問循良方外咨禪悅識破夢幻因無生亦無滅報國期致身耿耿丹心熱偶罹豺虎亂誘繫凡百折砥柱不可移守義心如鐵不敢懷二心借口豫讓列豈不思舊發慷慨以自決存身將有待欲以恢大業所事已垂成寧慮禍機洩一死酬君親日月同昭揭憑弔古今事三嘆增悽咽先死及後死忠在無勇怯事成或事敗品在何優劣較之迎廬陵忠貞昭奕葉吳子寄挽章紙落數行血雖我素心人憂來不可絕薦向拄杖頭吟風敲明月

### 春日送別魯公佟檀越



膏雨連雲合織成錦繡新  
明月夜初滿還照別離人  
昔君出東海挾策遊  
帝闈為攀龍鱗上早列虎帳臣  
不忘山水約還以風雅親  
詠諧有道骨起坐無凡塵  
偶逢分袂日常憶聚談  
晨俚言博一笑何日結前因  
榮程芳草綠步步是陽春

### 答孟陽熊檀越登山韻

遁跡荒山寺鋤雲愧遠公  
且無名著世常有鶴鳴空池  
柳臨春綠白雪點蒼松  
勘破醯雞甕不疑蛇影弓  
開池得皓月種樹引清風  
翰墨金門出訓筆搜腸窮  
才華空鄴下霖雨濃山中  
逃禪如不棄煮茗再相從

### 贈別金檀越

四海風塵息八方雲霧湮  
細推人物理各質有前因  
愧我居巖谷惟君不厭貧  
名開虎榜首曾受龍顏諄  
灰財成節勁斗酒共豪賓  
榮枯唯是義得失總於仁  
氣骨如山重心融似水均  
臨事無遷改方顯丈夫身

### 次卞司馬遊東山韻

勝概杳何極登臨興藹然  
披雲僧入定載酒客逃禪  
鳥弄枝頭婉鐘聲野外  
縣欲題千里意猶隔幾重煙

### 贈臬憲高護法榮陞

驄馬連雲貴雲泥不隔津  
永昇新慧日重識舊蓮因  
道義懷千古忠全惟一真  
更教泉石遠艸木盡霑春

### 次譚牧州魚聲韻

不戀龍門路清音出梵宮  
石人霑法雨花鳥度宗風  
悟滅諸非盡聲虛萬籟空  
三乘微妙旨祇在一聞中

### 同友人賦得月下聽溪聲

野樹煙鋪密行吟共月前  
溪聲藏白練風靜響飛泉  
霽色開晴嶂蟾光映晚天  
風情無限意趺對興悠然

### 復史春元問道韻

原是自家物西來有甚麼長天倚慧劍杲日映江波舉足知端的揚眉豈  
錯過分明日用處不必問如何

二

為問西來意當人會得麼層巒浮翠藹碧海漾清波莫以無為是徒勞有  
益過但能離我相自去靜中魔

### 次登山韻

寺結高原地金繩萬壑中鹿眠依翠竹鶴立就青松有意皆非實無心境  
自空微風生嶺上蕭瑟出雲中

### 送中丞曹公枢歸值雨有懷

為憚廉清節蒼天雨淚深忠魂何遠地飄魄應寒砧暮宿隨僧舍晨歸度  
鳳岑存亡無限意回首欲沾襟

### 友人至山題以贈之

環翠千峰拱溪聲永日潺湲雲浮嶺上日月走盤間青鳥啼幽壑苔紋繡  
石斑目前風景足何用苦尋攀

### 送別在臣楊檀越遷楚黃郡丞

秦擁龍文出賣刀賢佐逢才能千里駿聲價五花驄柳色黔山外琴鳴江  
楚中坐清南服地指日遠褒封

### 詠桂贈友

碧樹凝秋色寒林爽氣頻丰姿標月靜潔志凜風塵別去蘭馨遠還同菊  
興新花神頭點處永佩憶天真

### 贈遊山客

旭日照黔靈四圍氣象明山開非鬼斧路鑿有仙名境僻塵心靜溪聲鳥  
語清賓朋同席地細看落花平

### 訓夏孝廉韻

山青知雨過水湛月臨溪竹翠留雲宿松孤待鶴棲春濤和雪曲秋雁伴  
雲啼韻合煙塵息清風拂柳堤

### 春日閒詠

大塊煙雲合春深處處繁動觀芳艸秀靜聽柳鶯喧日色榮寒榻清香遞  
竹門驚披蝴蝶夢物我老乾坤

### 友人過訪賦贈

重道輕浮世才華氣且英理明機萬斛義尚識三生聲價風雲合禪源法  
海清從來金玉汁水遠共山明

### 次田春元夜賞菊韻

秋香寒夜發賞豈待時過喜對青娥質同聯白雪歌涼深星冷現夜午霜  
情多盡此良宵夜清吟爽更多

### 春日次訓張詞宗過訪不遇韻

晴春承馬轡谷鳥報音來柳放和風暖梅榮鬥雪開詩名留靜案客路冷  
蒼苔隔宿無煙火輕鞍蹀躞回

### 贈別乾御一乘二禪人

浩渺風塵急豐敦畏散筵冠年勤苦道漏刻博言詮聚首青鷺勝離愁白  
鷺天難於分袂處柏子裊輕煙

### 同友人登大悲閣望武侯祠

寶閣玲瓏渺莫窮登臨又聽上方鐘青山疊疊頻鋪翠綠水灣灣應幾重  
大士紀從周代記武侯功業漢時封尋知清潔循良事始誌而今載玉峰

### 次譚州牧鰲磯浮玉韻

柳煙夾岸映晴光瑞靄山城接大荒一水中流磯砥柱雙虹常拱待鰲翔  
月沉石磴縣清影風度溪聲過晚涼一目翛然空法界悠悠千載鎮滄浪

### 壽撫臺慕檀越

九如懽祝慶南山丙曜高縣參井間萬六椿榮綿鶴算三千桃熟醉仙班  
調元澤自臺中露壽國丹從掌上還敬指梅花當頌軸和羹有約待新攀

### 壽撫軍王檀越

祥鶴翩翩遶檻時聲聲戛漢啟人思烏臺香襲添籌祚瓊樹花開砌獻奇  
瑞靄金莖浮壽斚歌繁湛露應昌期倩翁朝隱誰先覺鸞馭陳桃始見知

### 次撫軍楊檀越遊山

重重疊嶂擁岩嶢躡磴披雲到碧霄一日峰巒青個個四圍花木翠翹翹  
推窮理事心非有洞徹機言意廓寥玩罷欲歸歸欲望亭臺天外雨花飄

### 贈撫軍王檀越服制還京

道化明城久植培今朝又見子瞻才盡知濟旱多霖雨佇看和羹待巨梅  
上界璣衡參七政人間勳業應三台東山暫往酬恩重好為蒼生特地來

### 次梁道臺登東山韻

平原擁出青芙蓉插入丹霄雲霧封巖岫花開時度鳥江城煙抹遠聞鐘  
雨添嵐氣新詩爽風送樺香舊話逢不憚問禪來此處三生石上敘從容

### 送別曹公子值雷雨感賦

轟林一霎洗程新無限離愁誰為伸思去迢遙鄉國土看來慘淡舊時人  
蒲塘綠滿遊魚啖柳暗青陰鳥語勻萬里天涯攜手別此心難盡又諄諄

### 贈糧憲傅檀越榮陞

物我同仁布澤均金腰先種又重新花開萬里香江地果上三臺壽國身  
政頌有聲天下滿諛諧不厭野人貧真誠大雅清名遠芳翠聯聯盡占春

### 過般若庵

曾思有約過雲庵幾聽溪聲野外縣雨細蛙鳴清協韻風和鳥語共談禪  
閒尋竹院烹茶坐倦掃松陰枕石眠疑是葛天風化裏爐香一縷樂悠然

### 同(學副)臺(趙王)二護法河岸蓬居作

結茅江岸喜清幽物象無邊四望周幾樹柳煙橫薜磳數行車水到粳疇  
殘經開卷和風演苔磴垂竿待月收日用翛然隨意處波濤不盡響中流

### 遊大悲閣

寶閣崢嶸俯碧川登臨四望興怡然青林幽鳥啼空外花落香風到客邊  
夾岸水聲銅鼓外(有銅鼓磳)卷簾山色鳳樓前清幽勝景多堪賞坐久忘  
機興自便

### 花朝

漸度陽和萬象新花枝濃淡出風塵年光乍入四旬外節令微沾二月春  
色相嫣然爭旦暮園林遲速感精神從來詞客多遊覽言下津津向此辰

### 詠梅壽東林法兄

初度玄冥卻有梅律陽先應一枝開信知佳卉無雙品獨占名園第一才  
憶昔隴頭憑寄意而今特地寫詩懷清奇自是花魁首好上雲山壽域齋

### 次荅覺庵胡居士

逃名丘壑伴林松何幸奇緣世外從自信煙霞惟我有難將詩酒與君同  
三生石上花含笑半畝池中月色溶好理前身金粟事居塵策進舊禪翁

### 次眾春元遊山韻

小壑丹丘倚石邊澄澄碧水映長天林間野叟閒溪徑雲裏群仙敞玳筵  
星聚北山千嶂迴光分玉帶一燈傳舊時王謝今重見獨愧支公拙簡篇

### 訪殷夢臣先生不遇

春日尋朋過水涯溪山深處見桃花方池昔擬謝靈宅五柳今逢陶令家  
南國知心昭日月故園回首暮雲霞杖頭久乏邀賓費賴有茗鐺當酒賒

## 訪東山梅溪法兄

扶筇底事步林泉為訪知音興偶然山境晴嵐生石谷會城燈火續寒煙  
牧樵歌遠聞雲外鳥雀聲幽落檻前物換人間虛夢醒馨馨梅放滿溪邊

## 掃九峰開山祖塔

林宮手闢甲南滇百折幽尋鳥道縣霞照曉山松箇箇溪迴寒浪月涓涓  
千秋舍利神龍護一席金襴昭代傳膜拜愧無跨灶略聊將俚句祝爐煙  
離侍巾瓶廿易霜閱來人世幾滄桑訃飛千里肝腸碎杖曳雙林涕泗滂  
石室堅函金鎖骨香雲空繞應真堂爐煙綵結酬三拜哽咽吞聲思念長  
聲喧南北若雲雷寶殿重樓手自開天馬峰迎白鹿嶂繡獅巖俯碧烏臺  
天留寶鉢盛珍供石化仙儔傲劫灰臨濟家風聲自遠箭機能奪子瞻才

## 次法瀾禪師韻

髫年歷練荷先翁得睹慈顏禮大雄澗水長流千歲月香雲猶戀一天風  
肝腸寸斷猿聲應燈焰重光鳥道通滿壑松濤聽不盡茫茫匝地雨煙濛

## 贈九峰黽中兄

祖風秋晚賴支撐越格規模獨讓兄冰雪面開青嶂迴春芳眉立紫芝榮  
庭前翠柏千株秀檻外幽泉一鑑清此日同吹無孔笛莫愁高調少人賡

## 雁字一行書

隨風遠至一行書隱隱摩天意自殊斜似之人常變體彎如心月又難塗  
翩翩乍擬鍾繇式肅肅還同索靖模此格非為真艸隸紛紜點染太清圖

## 挽曹大中丞(二)

廊廟倦倦繫遠心幾思揮翰破幽雋忘軀不念功名重報國寧辭鼎鑊深  
地下忠魂昭日月天涯客夢繞山林從來忠孝標千古松嶺常聞鶴唳音  
屈指歌遊跡若徐丰姿何在謾欵歔禪那已破浮生夢錦繡空研數代書  
秋半林蛩蕭瑟裏夜深山月晦朦初牽愁步步增遺思無那關心念未除

## 和有牧李居士久別來山韻(四)



夜來星月照簷羅幸得心交於此過一日懽逢歌石鼓十年遠隔望銀河  
鳥飛天外迴翔偏客晤山中題詠多作句倦眠鄉國近惺來不覺在雲窩  
夏日長明綠滿天客窗清話問桑田而今戰伐安平息正好溪山樂隱眠  
花樹鳥啼空裏性月澄水現定中禪詳觀物理虛生夢眨眨風光又一年  
竹窗看古寶箴規句句法言有所思不幸髫年父雖成道業問心師風吹  
雨過雲增岫鳥語花香水滿池此日林亭頻對望肝腸未盡雪添眉  
夜靜山房悄寂聲未眠燭淺覓殘燈琴心照我清音遠劍氣惟君世累輕  
想念故園觀日近常將墨水染雲城今晨送別巖傍路珍重前途次第行

### 次孔詞宗登山留題

蕭蕭清晝一塵無偶爾良緣到索居昨夜山房星耀炯今朝谷口道風舒  
文章豈在焉而已佛法難同之者歟學問既成千古業何妨重謁慧公廬

### 次中丞袁大檀越韻

皓麗當天一望中玲瓏巧幻運籌工遶峰晴氣南旋北印水寒光西復東  
人向塔前明佛理祖於旛上顯宗風垂慈遠紹無餘事留步丹梯引導翁

### 喜大之胡長者入道

力到功成果自圓佛緣絕勝越諸天浮生覷破心王定竹帛遙垂體道堅  
掃盡白雲方識月澄清滄海好參禪欣逢曇發千年瑞茂葉長新代代傳

### 遊海子玉京山

石磴盤層上玉京登臨四望野雲橫奇峰矗矗參天秀小艇溶溶繫水晶  
塵務遠離詩思爽忙中卻得靜情生為僧祇解禪那病碧落霞敷遍界明

### 次東林玉和尚

奇峰秀出漾波光一磬長春鎮八荒笛韻樓頭風斷續磯撐水面日浮翔  
苔漣月影凝清露[石\*親]帶寒煙曉夜涼培植前賢今已矣惟餘九罩  
鎖滄浪

### 菊

寒榮卻羨爾芬芳不受淒風一辦傷勝格能甘露曉露孤情豈畏凜秋霜  
延齡未瀉南陽浦招隱名增陶令莊群卉盡凋知勁節獨餘靜影對清光

### 粉蝶夏來時

何事翩遷度曲廊園林遲速競瓊粧輕盈枝上加冰繭閃灼籬邊似雪揚  
半艸半花風細細頻來頻去影雙雙等閒識破莊周夢千夜何驚覺得忙

### 和時乘夏詞宗韻

清溪疊嶂衍喬松共蔭畦源物花穠跼進何如退步穩灰心自覺俗情鎔  
月穿柳影常澄靚雨過花陰有淡濃大抵人生聲價重賢名青史有來蹤

### 答司南貢元

聊將園堵隱江城一榻蕭蕭少客新今遇陽春聯曲調不由墨水染煙塵  
法行大地容僧紀碑立長亭讓士珍若會野人無意句導迷於此悟前身

### 黃詞宗登山分題得柑字

逃名避世樂山寒有客相邀踏岫藍日映桂香飄遠座風敲松子落澄潭  
星輝有故明僧定廚供無炊慢客驂莫謂當年鍾飯異鐺茗款煮且陳柑

### 山居

非凡非聖箇閑人不愛聲華不厭貧幾則偈言隨手頌一生事業沒心親  
憐他花瘦常留雨喜爾鶯多欲挽春自是山家真快樂石林雲物總無塵  
特地層巒闢梵宮重重殿閣倚長空嶺頭花艸籠輕霧山外雲霞漾遠風  
好鳥吟春深樹裏孤猿嘯月過林東靈臺自是天生別登眺悠然萬物融  
髻年蠹念愛山中日用生緣世不窮為法難如紅雪子真傳豈愛白頭翁  
幾回屈指劫前事萬古推心此刻同倦枕猿聲啼夜月恍然不覺日頭紅

### 山居次答昇旭詞宗韻

趨風幾度到山巔何事垂青夙有緣古調德堪斑管述今知才向口碑傳  
喜聆深吻融斯道坐對清談合上玄自別良能衣馬後嶺頭惟見石嵐煙

### 閒詠

關中兀坐已忘時放下全無一事為啟牖忽觀天地外鳥聲啼在杏花枝  
樂道安閒脫辱榮冰心一片洞圓明攜筇昨夜寒江望月自皎兮風自清  
翠嶂清溪跨白牛樂眠水艸已忘憂橫吹鐵笛無腔調水月松風一韻收

### 紫薇

瑤天一片映霞紅影落庭前破色空擬是紫衣傳不盡等閒分付與勳風

### 避亂感懷寄殷夢臣先生

惱亂風雲出夜郎幾尋山嶂路空長伴身幸有烏藤在隨意棲遲挂鉢囊

### 贈蔡大中丞

弘文睿智聖同齊澤滿滇黔萬眾知因視南山泉石遠臨行書句作箴規

### 聞提臺侯公訃感悼以寄

忽訝風吹嶺上梅飛來片片點蒼苔知君自有清香骨種向墳前始念灰

### 春日

春勝山川綠連天風雨速隔林聽曉鏡破霧鳥聲出

### 和純乾道人韻

滿月照山樓倦眠枕石頭魚龍江海上把釣任垂鉤

### 山房閒作

月影秋潭現鐘聲靜夜頻隨波逐不散總是岸頭人  
二

法門極則事海墨書難盡只在一毫端反聞聞自性  
黔靈赤松領禪師語錄卷四(終)

書問

復祇林羅居士

默坐間居士書至讀之大有青出於藍之器想賢友與山野多年舊處篤信恒守此道非止一身善慶實滿門善慶也山野曾聞富貴者送人以財仁者送人以言予雖非仁者願進淺近之言令開門見山內外無滯只是信即心是佛者個信字卻要信得極所以教中道信為萬緣功德母長養一切諸善法居士必須將這信字一信到底無滯無礙信自心是佛畢竟是佛語默忙閒信念堅固物隨<sub>己</sub>轉<sub>己</sub>即佛也若信不堅<sub>己</sub>隨物轉將佛轉成眾生去也居士豈甘於是也更有真性信中不著佛不著眾生湛然常寂步步踏著總是香積世界心外無佛佛外無心心佛無二脫體全彰到此亦是信之堅固非從外得不與佛相干也所以古人云道源不遠性海非遙但向<sub>己</sub>求莫從他覓覓即不得得亦不真若不如是莫說予度任是三世諸佛歷代祖師齊來同行同坐亦難度也六祖云迷時師度悟時自度切莫言父母所累有何累耶孝義乃助道之緣脫輪迴之本大丈夫之所為也入泥入水一點不沾方顯手段如此則法門有幸不枉三生石上舊時人耳。

復張貢元

久耽幽靜忽老居士偈至可謂塵勞中津梁也但公之意欲先就功名而後從佛殊不知佛正在功名裏相隨也古有選官選佛之說千古常在倘於功名之際緇素得出則千古佛狀元亦永垂不朽耳爰復偈曰本無明昧教誰醒但動思惟<sub>己</sub>是塵直透當元關捩子一毛頭上現乾坤。

復剖元書

昨接來教足知賢友與予世外之交肝膽相照但不知果有世外之交否若有正所謂坐塵勞內轉大法輪倘若渾然一念純清絕點不作世間想不作出世想方可名為山野知<sub>己</sub>也為爾勤勞只得順水推舟先通一線倘賢友不棄到此同炊鐵釘飯充不饑之腹實千古之快事耳此復。

謝制軍蔡大檀越

恭惟閣下德合伊周名齊方召滇黔仰照臨之象越日常溫軍民荷披拂之  
功程風丕扇歡聲動於遠邇偉勳銘於鼎鍾野人夙荷弘仁感蒙護法昨遊  
滇省屢受垂青非徒德及一人更喜法門廣庇足見大護法現將軍身行菩  
薩道劫劫生生永不退轉矣兼承惠德厚布祇園草木生輝肅楮申謝。

### 謝撫憲王大檀越

恭惟閣下手扶陽泰心與天通靄靄好生仁無時而不浹堂堂經濟才隨地  
而皆宜奕世詠甘棠洱海仰澄清之烈再身來英國昆池沐浩蕩之恩萍釋  
乃物外野人感蒙護法九峰飛錫實擬訪道於張公千載逢緣繆得依光于  
裴相梵剎荷栽培之厚法門依日月之光蒙布朱提兼助名驥霑德無既寒  
色生暄謹肅荒函特申謝臆。

### 復張經公

撚指光陰忽驚秋至想老居士英標迴別邑吏若仙正思慕間忽承翰至讀  
之如明珠光耀熠熠照人何幸如斯但書言忘情寡欲乃為在家真僧勝過  
出家俗漢所謂僧俗有二理一無殊老居士高明正合斯也又言有超離之  
句與聖諦略有符合自山野看來只要直下承當無可不可若擬議之間又  
落二也古人有仕路逃禪偈曰學道須是鐵漢著手心頭便判直取無上菩  
提一切是非莫管此乃為官學道榜樣也老居士若道念純真篤信恒守異  
日自有出火金蓮之手段也今雖各處一方共月明於千里信筆書復不盡  
餘懷。

### 復王鎮臺

玉兔分輝萬里喜逢彩色金英繁茂普天爽氣秋分恭惟麾下心同月皎名  
與日新朝野生歡軍民共戴萍衲乃山中野人放懷林下雖與大檀越有上  
林之約亦幾乎忘之矣今承翰至盥讀遙空合十謝也昨晤西星白檀越臨  
山道及方知赴京大喜想驛路倉星無暇一晤有失迎候也今大司馬凱旋  
特修荒函奉復不知麾下可還記得三生未了公案否若憶得不枉此生之  
幸會也此復。

### 寄法兄天隱和尚

山中兀坐歲序頻遷望石上明月清光振古常新如對我兄面目矣想老法  
兄韜光價重葆合天和建立後學津梁流通人天正眼法門幸甚弟雖叨祖  
廕垢重德輕惟兄門庭高峻接引後昆先人雖去猶存佛祖之風不墜也幾



欲聚首奈途繁阻故不如願已今為先人全錄入藏兄若披肝破膽弟當鼎力維持以盡寸裏不然將先人心血付之東流盡埋沒於無所聞也時乃金英已放玉蕊清香又待踏雪探梅摘得寄來未可期矣。

### 復白檀越

涼風一葉冒雨登程想老檀越博學多能折衝萬里望白雲在天令野人晤若金蘭大有三生石上舊相知之面目也前承司馬大將軍於荒山垂青一段光輝多出檀越導引之力古謂人生顯宦中行一二椿人不及美事名走天下在公得之矣喜慶喜慶但麾下乃仁人也鄙言奉候者凡理事之中渾然物我於渾化中得理甚深若智明直用太過令人吞吐不下反為淺也所以山野前對大司馬云恩養士卒德施百姓灰金如土深用才能可以保國保爵今對檀越亦無二致也然萍衲乃局外之人不敢向人錯下名言今麾下既以深誠相契故以直告將來踏佛階梯未可量也。

### 寄博達法兄

一衣分授千古同心雲水相逢共圓前話恭惟法兄和尚一心清靜萬事和融渡海浮杯一鉢載南方之勝涌泉卓錫五花來百代之祥有子有孫衍臨濟之宗者眾矣可久可大繼先師之事者誰哉聚首已極之心分袂更勞繫念肅函附便不盡瞻依。

### 謝九峰毚中和尚

靈山一派千載如新遐邇交稱天龍隨喜恭惟毚兄和尚入如來室應祖師機膺九峰之心宗立百代之正眼傳薪得火祖宗添衣鉢之光異世同心兒孫匯源流之派法門有慶吾道通亨弟久切瞻雲坐春風於半月至人有真拜靈塔于千秋幸祖宗之不朽矣九峰主席情牽兩寶之臺五華聞鐘聲咽飛泉之谷法愛難別耿耿歸山陸路翛然皆叨福庇清燈擁坐如對面顏謹抒謝素餘不盡言。

### 復客問閱藏經書

康熙戊辰八月糧憲傅母延師於大興寺閱藏有客書問閱藏經是何意師答曰愚初入此門庭之時為德薄蠢鈍單單只會個無義味語而在艸衣木食之中自究不了就那不了之中踏得海中塵起陸地波翻窮滴滴上無片瓦遮頭下沒寸土湊足將萬物渾為自己而無我人眾生惟居山中隨緣度日不意月上菩薩延入此個保社翻閱海藏靈文幼時未在文字之中淘溶



今日就秘密之力煅煉所以破膽將帆放入大海波浪滔天利萬物之不爭處眾人之所惡不著左右亦不緩急一句一字與那渾忘物我草衣木食絲毫無有差謬因此翛然任帆飄去而我不知其所止正所謂棲鳥已知故道帆過看宿誰家者也偶爾奇逢枯樁子將帆一撞觀之恰是水中長人若是水中長人卻是枯樁子若道枯樁子卻是水中長人今日也不管枯樁長人渾成一氣和風搭在玉欄干上一任時人卜度因此臘盡聊艸復云。

### 法叔丈老和尚啟

太白法傳而遠胤於雙桂萬峰脈發方茂盛於錦江芙蓉復茂法蔭蜀川唯我法叔和尚歷世聲名紹前事業開言有節若演祖勤祖之光操履弘大如太青雲青之靜西蜀古佛誠哉間世耆英錦水盛名允矣法門碩輔姪濫叨祖庇謫劣根基未能常候阿大郎中座前虛受先師一言印可每思法門衰替幸有叔翁砥柱中流姪雖苦守林間聽緣而待初闢黔靈經十四載荷仗法力略可觀瞻因在荒闢之羈未得親侍座右只得遙空頂禮未卜何日天假良緣親禮法座耳伏願大揭祖心之慧日允垂正法之傳燈德尊賢壽而祐無疆道振乾坤而垂不朽矣。

### 寄寢堂大師

法道弱甚枯守殘軀跼蹐一穴未適大地寬弘攢眉細推難挽法門衰替只得潛居澗下抱道林間忽乾子回言知我寢公和尚法門宗匠熙世真僧清白丰標超過源源賢俊閒雲態度遮斷泛泛庸流恢乎猶龍之幸允釋義虎之疑奇哉蜀渝之有白眉矣欣羨欣羨茲徒蠢拙同為金蘭之麗澤誠坐杏壇之春風喜有華翁之盛愧無妙喜之能亦自慚於林間虛度也常思足下操觚最上平實虛賢萬木清暉點破秋風葉落名走天下人聞常飽不饑於雙桂之後有盡令人宮牆外望也不宣。

### 壽王撫軍啟

聖德凝和嵩岱效靈而毓秀真人濟世甫申應運以懸弧南極呈祥東華衍曆軍民共慶滇海騰歡如我在翁閣下節鎮控邊永錫帝心之寶弼奎陳才秘雅成法脈之傳燈五百會運名世今得奇人三千等諸列仙將紹芳景惟經一傳已知西來紫氣懷柔六詔允見南起彩雲福澤始符其德澤人和斯會乎天和萍衲乃山中野人物外乞士屢荷護持未能親候華山之筭特命門徒借獻滄海之籌聊修素緘引效嵩祝伏願壽身壽家而壽國積功並海嶽以無疆希聖希賢以希文雅道共乾坤而不朽喜陳燕賀聊藉鴻庥。

## 示文一法孫

吾徒滇遊未回老僧甚憐極矣不料有文禪乃吾嫡孫也既叨祖蔭係佛真裔擬報佛祖之恩必須將千七百則公案一一透明與三世諸佛同一鼻孔出氣無一點渣滓斷二種所知愚方為出格淨器也若不然者必離窩臼同老僧久住操履異日得意而歸好看雪山白牯放之滇南東觸西觸而無礙也。

## 佛事

大中丞曹公布按司道副臺府縣文武檀越請師於次南門外靜坐滿百期捐資建生生塔修大齋事以奠封疆功畢師詣塔云巨石培成突兀峰玲瓏八面鎮黔封無邊妙義從中現若筆遼天書不窮顧左右云諸大眾且道書不窮的是個甚麼今我福星大檀越建此生生之塔普利人天大作佛事拔沉淪之幽魄鎮疆域以千秋延黔靈於此舉揚其塔曰生生蓋謂生生之理不可盡生生之義不可窮生生之福不可量生生之妙不可說其蘊無窮其利甚廣蕩蕩然動天地感鬼神遠之有望近之不厭此生生不磨之功德非我大檀越之勝心孰能為此也復舉忠國師涅槃時代宗問師去後以何為記國師云造取一所無縫塔帝曰就師請取塔樣國師良久云會麼帝曰不會師曰貧道去後有弟子應真卻知乞詔問之後詔應真問其事應真良久云皇上還會麼帝曰不會真述偈云湘之南潭之北中有黃金充一國無影樹下合同船琉璃殿上無知識諸昆仲你看應真此偈甚是奇特今日黔靈又則不然近城西隅俯河岸塔啟生生標上善萬古常寧鎮此邦挺露威音那一畔那一畔且置如何是目前親切句良久云溪山盡是琉璃鉢日月常懸晝夜燈。

為心持和尚龕前上供揮拂子云生死不二一道前征獅象回互來去分明正法眼藏人天之尊某添列昆季唱一段無生曲子相送去也良久鳴指云此是持兄舊面門原封不動怕誰論而今返璧歸真際佛祖叢中作弟兄入塔歷煉久成獅子器金剛杵碎鐵山隈斯時歸去乘秋興散作人間物色暉卻將舍利黃金骨埋向青山絕點埃便入。

為白雲西老和尚起龕吾師楚藉飛錫黔居開化人間孤硬無敵兩建道場壽延七十緣盡撒手萬事俱畢諸大眾且道老和尚向甚麼處去莫是古廟香爐去一念萬年去丟下與法身齊長之色相與後人作榜樣麼今日不肖到此於不容安排處權設方便送我白雲和尚向安樂國中與大慈悲父同一居止受用去也引龕便行舉火執火炬云楚水黔山共一天吾師得地在其間今朝依報因緣盡棹轉虛空架鐵船老和尚架此法船卻乃得大願力捨心三昧得大柔和忍辱三昧得大普濟法藥三昧更有一種三昧未曾舉

著且道是何三昧以炬打圓相攏下云胤後兒孫多衍慶檀那福祿共增榮。

為西竺和尚入龕喝一喝云喝如雷震以拄杖連卓云棒似雨傾乾坤皆白玉大地盡黃金所謂百川異流同歸於海無量妙義總在心源如我西竺和尚生緣西蜀駐錫黔陽今朝果熟功圓直下請歸者裏遂入龕召大眾云且道者裏是何世界莫是華藏世界耶香積世界耶極樂世界耶如是一世界猶是教乘中事我祖師門下向上一路則又不然喝一喝云會麼於此會得則知西公和尚與如來涅槃會上入金棺伸雙足以示迦葉無二無別其或未然黔靈今日與眾傍通去也良久云入此如如真淨界古今常放大光明。

昇雲和尚訃至設供數十餘年成莫逆何期一旦蚤回鄉爐焚柏子煙雲靄散作乾明滿院香。

設天說和尚真拈香天地之清太虛寥廓忽出一個禪翁坐斷萬機不惑所以得法本師續為臨濟嫡脈平生名行難言寂然而成天說今日留蹤蔭子孫千年長照一輪月。

為德本耆舊下火執炬云清涼國內有英才法身淨妙絕塵埃雨灑風吹難動著金剛體固菩提胎甚麼物恁麼來逐之不散蕩之不開諸昆仲且道是個甚麼良久云萬緣俱息處一念自歸真攏下火炬入塔舉骨云今將一具黃金骨瘞向千秋始化龍若會德公安樂處青山常在白雲中依山臨水錦繡文峰兒孫衍慶瓜瓞重重所謂道逝者如斯無盡意黔南城畔水流東。為中丞如夫人薦福舉火東魯隨鎮黔南地何意參星中夜飛一點愛緣分不下令君幾度在深思有曹公孫氏之靈在生之日淑德賢良大有閨中儀範不幸一疾告終經今三載矣中丞憫念大建冥福請黔靈于此舉火黔靈到此并無別說惟我祖師門下無生法忍令亡魂超化舉火炬喝一喝云喝下又添三昧火清風送上斗南天。

為趙檀越恭人起棺大洋海內打鼓須彌頂上聞鐘業鏡將來照破翻身跳出虛空此是前賢登聖偈即今恭人龐母又則不然仁慈惻隱少人知萬類于心定不移大有光輝先後應生平培就上天梯豈拂子云大眾見麼接引導師從拂子頭上放大光明接引恭人登寶所生生穩坐白雲鄉。

## 行由

康熙壬戌夏門人大拙率眾於方丈請示入道因繇師堅卻不<sub>已</sub>乃曰予韓氏子生於甲戌四月廿四祖籍長沙寓蜀潼川父諱亮公母謝氏六歲慈父見背母兄撫而教之未幾遇亂隨戎入黔至十五歲每思浮世轉眼成空立念齋戒欲入山修持有袁氏子聞之結伴修持逃入南望山中艸衣木食惟以念佛收攝身心將滿百日袁氏畏苦奔回予更入深山精進念佛骨瘦如柴不料兄責袁氏同來山中勸回終不茹葷毅然退姻數年混入外道知非

遂捨參九峰靈藥和尚峰曰年幼之人求個甚麼予曰某為生死事大請師開導峰垂下一足云會麼予曰不會峰笑曰老僧一腳頭也不識遂命參萬法歸一自此行住坐臥之中將話頭如靠座須彌山一般穩穩密密復指依白雲西識和尚為業師後往滇同峰居五華寺夜深危坐峰曰會老僧三載矣汝做的工夫響予曰只在一處峰曰如何是一予不能對峰大喝予隨喝峰曰老僧喝有意汝喝何意予又無對峰劈面一掌曰汝善下喝予禮退自此定限以悟為期方焚頂香立願若不精進悟明大事懶墮偷安永墮沉淪勇猛提究不分晝夜雜念轉多如水上捺葫蘆相似自思似者般做不上路必是往昔業重又焚臂香立願每夜中昏沉太重站立不住將身繫梁上以遣昏散如斯三月餘工夫稍覺純熟惟疑業重焚香立願如前自後工夫成片總是一個話頭現前一夜危坐恍然入定忽燈花爍爆驚覺曰萬法歸一是此理也和尚一喝是此理也次早到九峰問萬法歸一一歸何處若人會得是何境界峰劈頭一棒曰是何境界予曰若恁麼瞞我不得了峰曰試道看予曰月在波心說向誰峰曰此子雖幼後亦堪用予曰不可將長裁短禮辭復歸白雲艸衣木食甘苦自若閱華嚴至如來現相品與諸天子說法諸天子常聞天鼓之音非從東方來非從南西北方四維上下來此天鼓之音不生不滅如我說法亦復如是遂將從前所得翻然打失全身放下後於遵城參本師和尚師問何處人予曰潼川師曰既是潼川與老僧同鄉同在甚處予曰同則同異則異師曰儻侗漢予曰某甲喫飯和尚飽麼師便喝予亦喝師曰老僧喝有意你也亂喝予曰是麼意師連棒打出予少間禮云適纔觸和尚師云放汝三十棒次日呈頌師閱曰是悟耶是學耶予云不可捏目生花便拜師一踏云慎自珍重後書偈拂囑曰此去深隱自有龍天推出予歸白雲侍業師住靜康熙丁未春都閩張公請住省中壽世禪院予見事繁就本院閉關於中磨煉千日期滿值撫軍曹公司道文武眾檀越造法衣法被請出關結制又請開建黔靈於三年中忘身為法上不能報佛祖師長父母深恩豈以淺解便謂入道唯脅不至蓆以繼苦心耳珍重。

黔靈赤松領禪師語錄卷五終

---

## CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）



## [前往捐款](#)

---

### 劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---



## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---